



TAPAK 7

Kalpana Chawla taküm otsü film nung Priyanka-i shilem agitsü



TAPAK 9

Sorkari Hindi mebenoker, saka ajungkettsür: Rijiju

VOL. XIV NO. 185 (ADOK 185)

DIMAPUR

TUESDAY

APRIL 25, 2017

5.00

Chhattisgarh nung Maoist telungpurtemi CRPF sepai 26 tepset

Sukma, April 24 (Agencies): Hombarnü Chhattisgarh kübok Sukma district nung Maoist telungpurtemi CRPF (Central Reserve Police Force) sepai 26 tepsetogo.

Telungpurtem jagi sepaitem indang prangpongtema auyaa bener ogo, ta osang angazüker.

CRPF Deputy Inspector General M. Dinakaran-i, iba amakba nung sepai trok yiru aser yirua alir rongnung sepai anabo tajungba kümogo, ta metetdaksü.

Tanü 12:25 ako meta Bastar region kübok Kalapathar tesem nung 74th battalion nungi CRPF sepaitem aser Maoist telungpur na tsüngda khatep tenzüka liasü.

CRPF sepai kati, "Mezüngbuba nung yimdaklirtemi onok aliba tesemji jangja, iba sülen telungpur parnok 300 shii onok amak. Onokia telungpur aika kshetogo," ta ashi.

Chhattisgarh Chief Minister, Raman Singh New Delhi-i oyaa liasü saka iba osang angashiba sülen Raipur-i meyipa arua ajungben rongdak senden ka ayonga liasü.

Iba osang angashia Ato kilonser, Narendra Modi-i, "Chhattisgarh nung CRPF sepaitem amakbaji tasümaita mapa lir aser tejashitsüka lir. Asen CRPF sepaitem tasüaitba atema nüma atanger. Parnoki taküm tenla agütsübaaji amajokbo masütsü," ta metetdaksü.

Ano külen Union Home Minister, Rajnath Singh-ia, "Sukma nung CRPF sepaitem tepsetba osang angashia jashir. Taküm tenla agüja asürtem nem ni akhüm agütsür aser parnok kibongtem den asüko lemsateper," ta metetdaksü.

Taoba ita nunga Sukma nung telungpurtemi CRPF sepai 12 tepseta liasü.

Taoba ita Kottacheru yim kübok arem nung CRPF 219th battalion nungi sepai 112 road opening duty aoba mapang telungpurtemi amak.

Iba mapang nung Lok Sabha nung Rajnath Singh-i, taoba küm ka tsüngda telungpur 135 tepsetogo, 700 puogo aser 1,198 temai adokogo, ta metetdakja liasü.

Nagaland nung National Panchayati Raj Day amung

Kohima, April 24 (TYO): Linük den külemi Nagaland nunga Rural Development Department-i National Panchayati Raj Day ayongzüka amung.

Iba sentong ya RD Directorate Conference Hall nung agi aser RD Director, Metsubo Jamir-i Panchayati Raj Act yangluba indang osang metetdaksü.

Rural Development department dang asüngdangyaa Panchayati Raj Act ya benoktsü atema mapa inyak, kechiyong Nagaland nung Village Council Act liasü aser India sorkari Panchayati Raj Act nung Village Council Act nung aliba onüktem benoknüa liasü, ta Metsubo Jamir-i ashi.

(Maneni tapak 11 nung...)

Gari lendong nung nisung ka tsükset



April 24, 2017 anepdang Phesama yimtsüing nung tsüokokba truck gari noksa nung angur .

Kohima, April 24 (TYO): April 24, 2017 nü National Highway-2 nung truck gari ka tsüokokba lendong nung nisung ka asü aser ka yiru.

Tanep züngia Kohima kübok Phesama yimtsüing nung FCI Godown teyangludak anasa, truck gariji lenküpokleni feet 200

shi tsüoka ai, ta Kohima Traffic Police ketdangser kati ashi.

Gari nungji kisüdang amshiba osettem bena liasü aser handyman tsükset. Truck gariji Dimapur nungi Imphal-i aodang lendongji ajuru aser gari anisangji mozükidang anepaluba sülen anizükogo, ta ketsangserisa ashi.

Khristantem reshikangshir telok anema Aor sannükertemi nokdaksü



Kumlong Baptist Arogo nung tan April 21 nungi 23, 2017 tashi Ao Baptist Pastors' Fellowship 20 buba lokti senden akaba mapang parnok külemi agiba noksa ka yangi angur.

Dimapur, April 24 (TYO) : "Asen lima nung election merüka agitsü aser Yisu dak amangertem reshikangshiba asoshi mapang tajung ka agiteter sarasadem yinzü ka tenzütsü aser aji kukua lumia sarasademba nung tembangtsü," ta Aor Baptist sannükertemi teletetba takang ka agiogo.

Parnokisa "Khristantem reshikangshiba telok nem vote magütsütsüla," ta ajangajanga lemtetogo.

Iba teletetba ya tan April 21 nungi 23 tashi Kümlong Baptist Arogo nung Ao Baptist Pastors' Fellowship (ABPF) 20 buba senden amondang lemteta liasü.

Kasa senden nungsa sannükertemi "Senso mesüra yimtsüing candidate shimer

election-i yokba yimya aser inyakyim ya malitsüla, kechiaser ibai ajanga senso ka temeten arakmoka ayur, koba ajanga election merüka agitsü nokdang," ta teletetba ka metetdaksü.

Ano, sannükertemisa "Clean election omen ken ka mejema Ao arogotem ajak nung atentsü," lemtetogo.

Item sentongtem ajak ya ABAM Clean Election Core Committee den yaritepa inyaksü ta ABPF-isa metetdaksü.

Ano, tanü India tesem balala nung Khristan reshikangshiba mapatemkanga ataloker asünungji, item mapaji anema Aor Baptist sannükertemi "India tesem balala nung Khristantem reshikangshiba anema India President dangi shidi

ka zülutsü," renemogo.

Iba ABPF 20 buba senden sentong April 21-23 tashi Kumlong Baptist Arogo (KBA) nung "Züngkümshidi" omen nung ajemdaker temoatsü tulu ngua katettsüsa Kumlong arogo aser arogo puri kanga dang mulungsoa tenla tulu agüja iba sentong anepaluba asoshi parnok ajak dang kanga pelar ta ABPF ketdangpurtemi metetdaksüogo.

Ano, sentong nung Tsüngrem osang abenertem Rev. Dr. Wati Aier, Principal OTS, Rev. Dr. Mar Pongen, Principal CTC, Rev. Bendangmeren, Pastor KABA aser Rev. Maong Lemtur, Associate Pastor DABA parnok ajak dang kanga pelar ta ABPF ketdangpurtemisa metetdaksü.

Meimchir shia tasodang nungi temeten lir: NHRC

Dimapur, April 24 (TYO): April 24, 2017 nü ATI, Kohima nung National Human Rights Commission (NHRC)-i Schedule Tribe aser Schedule Caste tem timtemba aser khurettem ajangshiba indang onüktem atema sentong ka ayongzüka agi.

Meimchir temetentemji meimchir shia tasodang nung anguba temetentem lir, ta tanü Justice D. Murugesan-i o jembidang ashi.

Linük nung sensotem temeten kümzüka ayutsü atema National Human Rights Commission (NHRC) tentet aser meimchir temeten atema dang masü saka tanur nem mapa inyadaksüba, state ka nungi kati belenba, nisung shibelenba aser tetsür dak sendakba onüktem atema inyaker, ta paisa metetdaksü.

1993 küm NHRC tentetba sülen northeast nung state asem Manipur, Meghalaya o Assam semdangogo saka NHRC-i Nagaland semdangbaji tang mezüngbuba lir, ta Justice Murugesan-isa shisem.

Nagaland indang khuret ka khenyongi balaka, anungji state nung State Human Rights Commission (SHRC) ka tentettsübaaji kanga tongtipang. Iba ya ajanga dang meimchirtem temeten kümzüka yutettsü, ta paisa ayongzüka.

Sentong nung Joint Secretary, Jaideep Singh Kochher-ia o jembidang, "iba sentong ya Human Rights onük benoka lemsateptsü atema

maongka ka lir. NHRC-i state aika sema senzüogo aser iba mapang Human Rights Act 1993 kübok linük nung sensotem kümzüka ayutsü atema maparen inyaker" ta ashi.

Human Rights ya loktiliba nung talenba atema dang mesüra police-i reshikangshiba mesüra sorkari ozüing alema nisung tepsetba atema dang masü, saka Human Rights ya shisaliok, temang anema alibaren, chiyungtsü, mapa anguba amala sensotemi anogoshia nungdakba onüktem dena lir, ta Jaideep Singh-isa metetdaksü.

Nagaland nung State Human Rights Commission ka tentettsü ta imlar. Iba 'open hearing' aser 'camp sitting' sentong ya HRC tsüngdang benoka ken o tem angadangtsü atema dang masü saka nübertem dang meimchir temeten indang osang tali tejangjaba nung prokshitsü atema lir, ta paisa ashi.

Sentong nung Chief Secretary, Pankaj Kumar, IAS-i o jembidang, National Human Rights Commission-i Nagaland semdangbaji nübertem asoshi kanga dang tongtipang anogo ka lir, ta ashi.

August 3, 2015 nü NSCN (IM) den 'framework agreement' sign asübaaji Naga Yimten Tebilemtsü atema inyakba mapa nung teletetba ka agitsü atema tongtipang mapa ka lir. Küm 20 tashi ceasefire ajangja yimjung tensa nung liyonga arur aser ibaji ajangja

olemteptsü aser terenlok atema mapa inyakteter, ta Pankaj Kumar-isa ashi.

Tuensang aser Kiphire ama kin aika aliba district tem nung khuret aika adoker. Ano, kanga dang tongtipang onük kaji Assam-Nagaland arrtsü indang lir, iba dak sendakba ken o aika NHRC tsüngdang benoka lir aser state sorkar nem ken o tem agütsüogo, ta paisa shisem.

Nagaland nung State Human Rights Commission tentettsübaaji 2006 küm NHRC nem osang sangoktsü aser state sorkari chair person o züngsemtem shimtsü asoshi mapa teinyadkad lir. National Human Rights Commission-i semdangba ajangja civil society temi asenok nem khuret agütsüba onüktem asoshi asenok tangazükbatem angur, kechiyong civil society temjia telatetba kar kübok anidaksüla, ta Nagaland Chief Secretary-isa metetdaksü.

Tanü agiba sentong nung mendenji Home Commissioner, Nagaland, Abhijit Sinha liasü aser DGP Nagaland, L.L. Dungal IPS-i anküp tepela o jembi.

P.B Acharya-i pela agizüker

Nagaland aser Arunachal Pradesh Angh, PB Acharya-i Justice D Murugesan lenisüba nung NHRC teloki Nagaland semdangba pela agizüker ta sangdong ka nung metetdaksü.

Maneni paisa, state sorkar dang Nagaland State Human Rights Commission tentettsü atema temepishiba agütsü.

Nagaland University kaketshirtemi NCF Chennai semdang



Nagaland University kaketshirtemi NCF Chennai semdangba mapang tongokba noksa ka angur

Dimapur, April 24 (TYO): shilem agia liasü. Ano Dr. Ditalak-ia Chennai nung Naga University Department of Management, Kohima Campus nungi teshimtet telok kati Naga Christian Fellowship Chennai (NCF Chennai) semdangogo. NU kaketshirtemji Deobair tekülem sentong nung aden aser parnoki ken ka ajanga semdangba mapang NCF Chennai-a semdangba atema pelaba olen ka lemsatsep. Special Educational & Industrial trip dak sentakba nung MBA kaketshir 26 den tesayur ana- Dr. Ditalak aser Imsulemla nungeri Chennai aser Puducherry na nung tesem aika semdanga liasü.

NSCW-i April 28 nü Legal awareness sentong ayongzüker

Dimapur, April 24 (TYO): nung Human Trafficking indang anogo ka, Legal Awareness sentong ayongzüker. Iba sentong nung tejaokertem rongnung Chiephobozou Sub-Division kübok Tribal Hoho, Women

Khriehu-i Kohima College nung Commerce section semzüksü

Dimapur, April 24 (TYO): faculty aser kaketshirtem ajak teinyaksü mapa lir, ta ashi. Paisa, iba college nung commerce section tenzükba ajanga college tejakleni otetsü aser tarutsü nung commerce graduates aika adoktsü, ta metetdaksü. Kohima College, Kohima Principal, Dr. Watijungshi Jamir-ia mapang tatsüka tsüngda iba building renema yanglutetba atema tesayurtem aser tanga staff tem dang pelaba metetdaksü. Paisa, commerce building ya sen lakh 18 indoka yanglu, ta metetdaksü. Pai ashiba agi, Kohima College ya 1967 küm August 9 nü amenok aser iba ya Kohima village nungi mangdang tajung alirtemi state yimtiba, Kohima nung shisaliok riju ka nungdak ta shisateta tentet. Parliamentary Secretary-i college nem sen lakh 2 tenla den Keyboard ka tenla agüja liasü.

Dimapur nung Open House Awareness sentong ka katsüogo



Dimapur, April 24 (TYO): Church-i inyakba project ka lir. Iba dak alia tanurtem nem chiyungtsü, shisaliok kaketem aser counseling agütsür. Iba nunga lokti balala nungi tanur arishi küm pongu nungi küm 15 tsüngdapur tanur 100 shi lir. Tanurtem den ghonda ka shi sentong agidang parnok dang pei temetentem indang tesayuba agütsü, iba den külemi parnoki mapang mashika nung 1098 ajanga CHILDLINE dang teyari meshitsü tesayuba agütsü. Tanurtem jagi ken ka tena iba sentong tenzük, iba sülen sentong balala agi. CHILDLINE coordinator, Kr. Lozua Kape-i asen temang nung shilem pezü kümzüka ayutsü indang tesayuba agütsüdang tanurtemi tenoktenoka angaa liasü. Iba sentong tembanga tsürabur aser guardian atema information CHILDLINE pamphlets lemja liasü.

Dimapur, April 24 (TYO): April 22, 2017 nü CHILDLINE Dimapur-i ayonga Ekran Pathar, Dimapur nung "Bridge of Hope" tanurtem atema Open House Awareness sentong ka katsüogo. Iba sentong ya tanurtem nem pei temetentem angatetdaksütsü nükjidong nung ayong liasü. Bridge of Hope ya maongka junga manguba tanurtem nem informal shisaliok tajung agütsütsü atema Believers

RTA-i sangdonger

Dimapur, April 24 (TYO): May 1, 2017 nungi tenzükä April 20, 2017 nü Regional Transport Authority Dimapur senden ka mena liasü, aser iba senden nung temzüng kar latetogo, ta tanü Regional Transport Authority Deputy Commissioner & Chairman-i sangdong ka ajanga metetdaksü.

Telemtetba temzüngtem rongnung- auto rickshaw driver temi seat capacity dak tali passenger memendaksütsüla, driver den passenger külemi amentsü memelar, iba den külemi passenger menden ajichilen insang (rod) inoktsüla, ta sangdong nung shia lir.

Ano Patkai Bridge adenerbo highway nung auto senzütsü memelar, ta sangdong ajangasa metetdaksü. local/zonal taxi para melenshir aser ibaji: Chumukedima nungi Kohima aser Kohima nungi Chumukedima tashi passenger shia paraji sen 200 asütsü aser Chumukedima nungi Medziphema aser Medziphema nungi Chumukedima tashi passenger shia para sen 80 asütsü. Maneni May 1 nü nungibo nija bus operator temi- inter state/inter district aser Assam line bus temji Blue Hill station/ Golaghat road nungi Inter State Bus Terminus (ISBT), Purana Bazaar-i belentsü metetdaksür, item ozüng nung manidakra Motor vehicle Act nung aliba ama temerenshi alitsü, ta sangdong nungsa shia lir.



HQ IGAR (North) kübok 36 Assam Rifles sepaitemi osang ka lazükba sülen April 22, 2017 nü Tening Town, Peren District nung police densema mita aodang melung malemtetba ki ka nungi Marijuana seret trok den tetsür ka apuba noksa nung angur. Iba dak sentakba ken o nung Peren district kübok Tening jila nung alir arishi küm 40 tetsür ka tenüng agi, Achim puogo, aser la den marijuana ji Tening Police Station ket nung agütsüogo, ta Lt Col Amitabh Shrama, PRO, IGAR (North)-i AR sangdong ka nung metetdaksü.

Kubolong nung Legal Aid Clinic lapok

Dimapur, April 24 (TYO): April 24, 2017 nü Kubolong EAC, Tongdiba Tongpi T. Sangtam-i Mokokchung district, Kubolong nung Mokokchung District Legal Services Authority (MDLSA) kübok legal aid clinic ka lapoktsüogo. clinic lapoktsüba atema pelaba lemsatsep. Iba legal aid clinic ajanga nüburtemi ochi temeten ngua tajangzük angutsü, ta shia pai nüburtem dang iba service agitsü ajungshi. Iba sentong nung shisalen sayurtemji- Phuleto Yeptho, Secretary MDLSA & JMFC, Apong Thongliu, Assistant Public Prosecutor Mokokchung aser I. Imkong Jamir, Retainer Lawyer MDLSA nung liasü.

Iba sentong nung tongti tesemdanger o jembidang Tongdiba Tongpi T. Sangtam-i Kubolong headquarters nung District Legal Services Authority (DLSA)-i legal aid

Nagaland Commissioner-i ITC semdang

Dimapur, April 24 (TYO): dang mepishi. April 22, 2017 nü Commissioner Nagaland, Sentianger Imchen, IAS-i International Trade Centre (ITC) semdangogo aser tang ITC nung Myanmar arrtsü atsü teyangludak reprangdangogo. Paisa, kobi meli state aser Centre sorkari tang arrtsü atsü tatsüdak indang jembitsü, ta metetdaksü. Paisa, Dan aser Pangsha nüburtem aluyimba li tuluka makai aliba teblemtsü indanga state sorkari lemsateptsü, ta metetdaksü. Paisa Dan aser Pangsha nungertem dang Myanmar kübok kidanger yim den tesendaktep tajung ayutsü mepishi. Commissioner den Commanding Village Guard Tuensang, Imsusangba, ADC Noklak, Mhathung Tsanglao aser Kohima headquarter nungi ketdangsertema dena liasü.

Iba sülen pai council hall, Dan village nung Dan aser Pangsha yim nungi GB council züngsemtem aser sensotem den senden ka mena liasü. Iba senden nung Commissioner-i sensotem dang Myanmar aser India na tesendaktep tajungba akumtsü atema survey agitsü asoshi linük ana nungi joint survey team nem temelaba agüjang, ta sensotem



Itanagar, April 24: China-i Arunachal Pradesh nung tesem trok nungja melentsüba anema tanü Itanagar nung All Arunachal Pradesh Students' Union (AAPSU) temi longkak aita jaja. Arunachal Pradesh ya India linük shilem ka lir aser teti India nung shilem ka alitsü, ta AAPSU-i metetdaksü. Iba sentong nung kaketshir noklang aika den nüburttem densema Akashdeep Ganga nungi Itanagar tennis court tashi jaja.

Karbi Anglong council election atema BJP renemshir

Guwahati, April 24 (Agencies): Taruba Karbi Anglong Autonomous Council (KAAC) election ya BJP atema kanga tongtibang asütsü, kechiyong state nung BJP sorkar amenlokba sülen Sixth Schedule kübok yimsü asüba tesemtem rongnung iba ya mezüngbuba election agiba tesem asütsü, ta BJP otongdar Dilip Saikia-i ashi.

KAAC ya BJP puri yimsü tesüdak lir. Yaküm KAAC nung züngsem kar aser executive member Tuli Ram Ronghang Congress nungi BJP-i meyipba sülen parnok yimsüsüba menden atsünga liasü.

Tang yimsü tesüdak council indang tatakzük küm January 13 nü küm 5 abensar taküm tembangogo.

Governor Banwarilal Purohit-i January 13 nü nungi tenzüka ita 6 atema council indang term

atsülangtsüa liasü. January 13 nungi tenzüka ita 6 mabensa tsüingda KCCA election agia menden kümtettetra inyakyim tenzüka otettsü.

"Election anogo ano mesangdong saka KAAC election atema onok mapa tenzükogo," ta BJP otongdra Dilip Saikia-i ashi.

"Election taruba ita agitsü asoshi imlar. KAAC election ya onok asoshi kanga tongtibang lir kechiyong BJP sorkar amenlokba sülen Sixth Schedule kübok yimsü asüba tesemtem rongnung iba ya mezüngbuba election agiba tesem asütsü," ta Paisa ashi.

KAAC election ya BJP pur asoshi kanga tongtibang lir ta asübaji, party MLA tem den külemi chief minister Sarbananda Sonowal aser health minister Himanta Biswa Sarma nunger dena, taruba

election atema tasa asaba senden nung shilem agiba ajanga jangja sayur.

Senden nung maneni party nung züngsemtem election atema renemshitsü asoshi lemtepa liasü. Iba senden State BJP tir Ranjit Kumar Das lenisüba kübok amen.

Taküm January ita Assam State Election Commission ajanga, 2016 December 31 nü Electoral Roll sangdongba dak sendakba nung mepaitoktetba timtem adokba ajanga 2017 January 13 matongdang election magitettsü ta metetdakja liasü.

Hokolbarnü tribal lokti balalai district headquarter, Diphu nung, 1951 KAAC election ozüng melenshia tribal tem yimden yimsüsübaren nung temeden kümzüka ayutsü asoshi khanga mangsa longkak aitba sentong agi.

Gram Panchayat tajungtiba Award atema Heriok Part II shimogo

Imphal, April 24 (Agencies): India sorkar, Panchayati Raj ministry ajanga Manipur nung Thoubal district kübok Heriok Part II gram panchayat, 2015-16 küm atema gram Panchayat tajungtiba shimetogo.

Taküm atema National



Panchayati Raj sentong Lucknow nung amongtsü.

Heriok Part II Gram Panchayat, pradhan Thokchom Dharmendra iba sentong nung shilem agitsü atema Imphal toktsür ogo.

Kasa mapang nung

Panchayat Sashaktikaran Puraskar, 2017 District Panchayat atema Bishnupur district shimogo aser village panchayat atema Bishnupur district kübok Thinungai GP aser Kakching district kübok Pangaltabi GP shimogo.

Guwahati Railway station nung GRP temi hon seret 3, ganja seret 19 apu



Guwahati, April 24 (Agencies): Osang tejangja kar angazükba sülen Guwahati Railway Police (GRP) temi mita bushiba mapang Guwahati Railway station nung ozüng alema shibelenba hon seret 3 apu. Iba den külemi ganja seret 19 apu. Iba ken o nung tetsür asem pua lir.

Guwahati Railway station nung ya mapang tatsüka tsüingta nung hon aser miim mozütem ozüng alema shibelenba bener aruba mapang apuba ken o aika angashidagi.

Tetsür ana dak tashiyim mapa inyakba ken o bentettsü akhanger

Imphal, April 24 (Agencies): Imphal nung tetsür tanur ana dak tebur telok kati tashiyim agi mapa tamajung inyakba anema tetsür lokti tetet kati aitsü aser tekeraba nung aibelena alirtem nem tapet temerenshi agütsütsü akhang.

Iba mapa tamajung inyakba nung shilem agirtem nem tapet temerenshi agütsütsü aser tetsür ana nem teyari agütsütsü asoshi Manipur Social Welfare & Cooperation Minister, Nemcha Kipgen-i Hokulbarnü metetdakja liasü.

August 14 nung Cheiraoba benjung amongba aonung tebur telok kati tetsür ana pua bener ao aser Imphal East tsütsülen tashiyim agi tetsür ana dak tashiyim mapa tamajung inyak.

Iba ken o nung police temi tebur chanu ka densema parnok 6 apu. Bodhbarnü Imphal East nung aliba POCSO special

court ajanga parnok 6 ya anogo 7 asoshi police tepuokdak yua alitsü tetuyuba agütsü. Parnok rongnung tanubusang ya 'obesrvation home' ka nung yua lir.

Imphal East Police, district legal service authority aser lokti tetet balai iba ken o bushistingdangba nung shilem tajung agiba asoshi tetsür lokti tetet temi pelaba osang ka Honibarnü sangdong. Iba ken o tekeraba nung obendang agütsütsü asoshi nüburttem aser ketdangsertemi yariteptsü atema temepeshiba osang ka parnokisa sangoktsü.

Tetsürtem anema tashiyim mapa inyakba, talisa benjung mapang iba ama lendong adalokba nungi kümzüka ayutsü asoshi ketdangsertem dang iba tetsür lokti tetet ajanga takhangba agütsü.

Central sorkari Assam nung NRC yanglushitsü memolunger: Tarun Gogoi



Guwahati, April 24 : Hombarnü Guwahati nung taoba Assam Chief Minister aser Congress lenir Tarun Gogoi osangbenertem den jembidang tangokba noksa nung angur.

Guwahati, April 24 (Agencies): Assam nung National Register of Citizens (NRC) yanglushitsü asoshi central sorkari memolunger, ta taoba mapang Assam Chief Minister, Tarun Gogoi-i aitsü.

"Ration card bo agizüktsü akok. Saka NRC yanglushitsüba sentong ya BJP sorkari memolunger," ta Supreme Court-i obendang agütsüba nung ajemdaker ashi.

"Ration card atema kicha tebilemstsü mali saka NRC yanglushitsüba maparen

monudaktsür," ta taoba Chief Minister-i ashi.

Gauhati High Court-i Panchayat kulikaket magizükba asoshi, "Panchayati indang kulikaket ya tanga document yarisemtsü asoshi agizüktsüla," ta Gogoi-i shisem.

Assam Pradesh Congress Committee telung nung mangatettep adokba indang o s a n g b e n e r t e m i asüngdangba mapang, "Ni anema nokdakertem joko tanga telok nung oa atentsüla," ta paisa ashi.

Indo-Bangla arrtsü nung sentaila lakh 1 apu

Guwahati, April 24 (Agencies): BSF sepaitemi Sen taila 2000 note nung lakh 1, Assam kübok Salmara district nung Indo-Bangladesh international arrtsü nung puogo.

BSF, 174 battalion Border Out Posts (BOPs) kübok tesemtem nung Bangladesh nunger ozüng alema shibelenertem senzüba Latang larirtemi osang tejangja ka agütsüba sülen BSF sepaitemi Deobarnü Khagrachar yimtsüng meita ao.

BSF Guwahati Frontier, Dhubri puria iba nung shilem agia liasü. BSF puri Charland tesem

international arrtsü nung temolung meleme bilemba nisungtem senzüba meita atar aputsü asoshi merang. Aji saka parnok Bangladesh tsütsüi jena oadok. Parnoki yangku ka nung sen 2000 note taila 50 den tanga osetem doktsür jena ao.

Item taila sentem Sukhchar police station nung agütsüogo aser iba dak sendakba nung ken o ka benokogo, ta BSF otongdari ashi.

Guwahati Frontier sepaitemia April 22 aser April 23 aonung meita aoba mapang sen lakh 4.40 alang nashi aser chang pua liasü, ta BSF otongdarisa shisem.



TIR YIMYIM

YIMOBILEM (EDITORIAL)

DIMAPUR TUESDAY, APRIL 25, 2017

Ayong merüka ayuba

Meilongi, meilongi asenoka asen ki kilong dang masü saka kima yimdong dena merüka ayuba nung kanga junga kümdagi. Ibaji tanü putu nung atalokba temelenshi ka asütsü. Yashi tashi asenoki asen ki kilong merüka ayuba dak alaka kima yimdong merüka ayutsübajibo asen mapa masü amai bilema liogo. Ibayongji, asenoki asen kilong merük dang bendenba janaona ajak kima yimdong mashimashi nung endokba agi asenok alidak temeketbo tesempatsüka topur mejungi kümdaktsüba asenoki ajangshia aruogo. Atangji, tanga tesem kar nungbo kiyongertemi junga mebilemdangi pei kidang okzüka janaona ajak bendenba tangar kimalen endokba mesüra kilentsü nung enoka yutsüba angur. Aji oda, motzü odaktsütsü atema kilentsü merüka ayutsü melen asenoki kilentsü nunga janaona enoka yutsüba agi, tang ama, tzünglu aruba mapang kilentsü nokdangadoker lenmang lenjang nung motzü ayimer aser lenmang raksar. Ibaji tezudangtsüka lir. Item yimya awashi memetetba aser merajemba ajakji asenok rongnung kati ka ajungshitepa tangatetba agütsütsüba kanga tongtibang kümogo. Iba dakji alaka ano, asenoki mebilemdangi inyakba mapa kaji janaona bendenba bener oa ayong nung endokba yimya ya asütsü. Tanü India nung kanga süoki ia jembiba aser inyakba mapa kaji Ganga aser Bramaputra ayongtem ama merüktetba mapatem asütsü. Nisungtem asoshi ayong ya kanga tongtibang ser nung asenoki kecha hau ta mali mashimashi menendaktsür. Aji oda, tesem aika nung yimteni dena town nung bendenba janaona ajak gari nung bener oa ayong nung endokba angur. Ibaji India len nungi arur kari angu nungbo asenoki memeteti parnok tsüngdang asenok kanga alutsüba mapa ka lir. Ibaji dang masü saka asenok chidiyongdinü dang asenoki ayong nung aliba taküm ajak samatsüsa miim mozü amshir. Ano, tanübo asenok ali telong nung akaba rongsen meteta aküm nungji, ayong anasa mijang atuba agi ayong tzüji dena tajemtsü makoktsüsa asenoki miim kümdaktsüdagi. Item ama meteta aser memeteti asenoki asenok akoksatsüsa inyakba mapatem rajema tangatetba tajung kati arutsü mapang tonggogo. Atangji, tesem aika nung mapang mapang shia yim nübodoka kima yimdong aser kilentsü merüker aser ano janaona endoktsü asoshi bendenba yima tapu balala apiteta inyaker. Ajisüaka, kanga tngtibang kaji item janaji kong bener oa endoker (?) ta asübaji lir. Asenoki asen alidak nungi janaona bendenba bener oa ayong nung endokra mesüra lenmang nung jajartem teni nembanger süitsüsa lenmang lendi anasa endokra, ibajiang tamajungba asütsü. Aji oda, akok tashi pei ki aser pei kima janaba janaona bendenba pei atsüki nung jana rongdokdak yanglua yur yangji polythene aser mica ama ali kuma maotsübatem rongdoker, ali kuma aotsüba janatempo ongken tur yangji bendenra, janaona bendenba endokba yimya ajak dang tajungtibaji aji asütsü. Ano, yimtenia janaona bendenba endokba yimyaji yim nungi talangka pilar tesem ka shimteta yangji terongdoktsü tashi rongdoktsü aser tebendentsü tashi ongken tur yangji endokra, iba jagi tzü mopong menenba mapatem nungi tuluka kümzüksü. Atangji, tanü putu yabo janaona dena teindoktsüla mali, kechisarina agi tanaben meyipa tagitarutsü yanglua amshiba putu lir. Aji oda, kaket tamajungtem agi ano tanaben kaket yanglur amshir, yin aser plastic tamajungtem bendenba tagitarutsü oset kuma yanglur amshir aser ali akümtsüba janaonatem agi ali temo kümdaktsür aluyimba nung amshir. Item inyakyim ajungaji lanurtemi angazüka inyaktsüla. Iba jagi asen lima nung tzü mopong memenenba dang masü saka arem kümzüktetsü aser asen alidak aser temeket kiyong aser yim kanga topur junga akümtsü. Nisungtem dak tangatetba aser pei lima meimba shisatsü alibaji pei kilong, kima aser yimdong merüka ayuba nungi tangar süisüpongertemi metetter. Iba jagi asenoki memeteti tangar nungi akümtsüba angur.

OLEMSABANG

Ao Senso nungi ni jendokba ken-onung kü tebilemdangba onüktem

- P.Chuba Ozüküm, Kohima

Ao Senden-i ni Aor senso nungi jendokba dak sendakba ken-onung kü dak atalokba aser ni tenjia arubatem metong metonga ayutsü asoshi ni iba zülü ya zülutsüsa akümer. Ao Senden-i ni Ao senso nungi jendokba telemtetba ya agizükstu mulunga dang lir saka ni ya tashi tenjitsüsa akümba indang ataloka arubatem tatongi nuburtem nem metetdaksütsü kü teinyaktsü shilem ka lir ta angateta itemi Aor aser Naga senso tajungtem den lemsateper.

Ao Senden-i yamala tesashi telemtetba agitsüsa akümba ya ni Naga Hoho nungi anenstu memulungba agi ta parnokki ashi. Parnokisa shia aruba agi, iba takangba ya Naga Hoho-i taoba mapang 2008 küm Rongmei nungner nem "Indigenous Naga Tribe" jenjang agüjang ta Nagaland sorkar dang shiti züluba ajanga lir. Naga Hoho-i mapang balala nung aiben yamaji masü, saka Rongmei nungner nem Garo, Kachari aser Küki kin tem nem agüstuba ama Rongmei nungner nem-a "Indigenous Naga inhabitants" jenjang agütsüyonga tai mali ta Nagaland sorkar dangi zülü ta khuli tejangja dena sangdongogo. Item atalokya-a-aliba mapang Ao Senden, Sumi Hoho aser Lotha Hoho Naga Hoho nungi atsüngtsü telemtetba CNTC senden ka nung telemtetba agiba ni meteta aru. Iba ama tongtibang telemtetba ka Ao Senden tapet sapang ka nung masü saka CNTC ama tanga lokti ka nung agiba yabo kanga temangmangtsü ka. Anungji ni ilonga Ao Senden office nung parnok Presidential Executive Council den 31st July, 2016 Mokokchung nung ajuruteper. Iba mensem nung ni ashi, Ao Senden Naga Hoho nungi atsüngtsü lemteter sura, iba telemtetba yimjak nung mesangdong dangsa ni Naga Hoho President menden toktsüdi. Idangji parnokki kü dang na anentsüji nukjidong masü aser iba telemtetbaji agia mali anungji na manentsüla aser Naga Hoho-i tamalen sorkar dangi züluba shiti meyipa magi tashi dang Ao Senden Naga Hoho nungi atsüngina atatsü ta ashi. Anogo ishika tsüngda nung Ao Senden Naga Hoho nungi anenstu lemtetba osang sangdong. Ano mapang tatsüka lir ni Naga Hoho President menden anogo tenet nu tsüngda tokjang ta 16.11. 2016 anogo tetuyuba agütsü. Anungji anogo tenet mabensadang Naga Hoho Presidential council senden 21.11.2016 amendang ni anentsü asüngdang, saka aji lokti-i khuli tejangja kar agüja-a ni manendaktsü aser maneni President inyaktsü nungloktsü.

CNTC aser yangji dena aliba senden palala-i maneni Naga Hoho shity sorkar dangi züluba meyipa agitsü takangba ret reta liasü nungji Naga Hoho-i sorkar dang shity ka (NO.NH/Corr-04/2013-18) ajanga taoba shity to meyipa agiba osang agütsü. Naga nungner kin palala tsüngta teputeper mesamatsü meji nung Naga Hoho aser ni akokba tashi Ao Senden aser tanga CNTC den tanglokba sendentem den tangatetteper kati arua amaliteper alitsü asoshi temerangdangba aika liaka, tatem nung Ao Senden-i ni Ao senso nungi jendokba osang kaketteper nungi angashi. Ni amanger, iba teinyakba ya Ao senden aser tanga CNTC den aliba loktitem taginuba ataloktsü asoshi inyak.

Aor lokti tulutiba-i koba mapa kü dak inyakogo, iba ya alia oa inyakba ka lir ta ni retreta amanger aser teküboklen agüja aliba onuktem yagi kü tebilemdangbaji jangjatsür.

(Maneni taruba adok nung...)

MELENSHIA ZÜNGDAKTSÜNER

Tir Yimyim adok 22nd April 2017 (Saturday) Vol. XIV No. 182 Olemsabang nung "Asen tsürabur tekülemba aser sobaliba balala ratet" ta züluba nung 3rd August Süngbennü aser 3rd May mongzüknü ta zülua alibaji, 1st August Süngbennü aser 3rd August mongzüknü ta melenshia züngdaktsüner ta tazünger ajak dang mepisher.

-I.Temsü Jamir, Landmark Colony, Dimapur

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepisher

Yi, atakatemba chiyungtsü


- Impur Kaketshir Telongjem.

Küm 10 tsüngda nung Ao lima nungi yi samatsütsü tenangzükba 2011, ABAM Küm tatem mungdang nung sarasadema lemteter küm 6 buba arur. Yi samatsütsü nükjidong nung arogotemi sentong balala agiba ngua pelaa bilemer. Item sentong nung yarisemtsü asoshi Impur Kaketshir Telongjem ajanga atangji YI YA ATAKATEMBA CHIYUNGTSÜ ka ta asen Aortem dang shinür.

1. Tetenzük nung Baptist Missionary temi mezüngyong yi temenen anema raratsü telemtetba agia liasü. America Missionary tem conference Kolkata 1875 nung yi nungi khenyongi pilaa alitsü sarasadema bangzüng renem. Iba telemtetba ya Naga tenem nung aliba arogotem nung Dr. E W Clark aser Kohima nung Rev. Rivenburg tenati arogo nung züngsem akümtsü asoshi mejemtzü aser piyazü nungi jenbua alitsü, iba jagi dang arogo nung züngsem kümtet ta özüng yanglu.
2. 54 buba ACYE Convention, 16th -19th October 1986 lemtet nung 1987 küm ya Ao-li lanurtem asoshi temesepba aser achiajemba nungi azüokba küm ta ajatsü lemtet. (Lemtet. No. 4 (iii))
3. 17th August 1988 Naga lima nung procession ao aser 1988 nungsa yi dokan ajak shibangang ta akhang.
4. 56 buba ACYE Convention 16th October 1988 nü terenemba "Hunger Strike" Government-i yi dokan tem meshibang tashi "Tasü tonga lumitsü" (Indefinite) lemtet. (Lemtet No. 6).
92 buba ABAM Central Council 9th November 1988 nu ABAM-i iba ACYE sentong nung adentsü lemtet (Lemtet No. 5 (i)) aser 44 buba ABTM Conference November 1988 nung ABTM-i adentsü lemtet. (Lemtet No. 6)
5. 15th November 1988 nung nisung 20,000 shi Mokokchung nung sentepa demonstration aser protest rally liasu aser 23rd November nü nisung 5,000 shi sign süa 15th March 1989 tashi nung yi dokan ajak shibangang ta takhangba agütsü.
6. Mokokchung Dry district ka maküm tashi teinyaktsü sentong yamai lemtet. 3rd January 1989 lanurtem "Hunger Strike". 4th January, Arogotsür "Hunger Strike" 5th January, Arogo nung aser 6th January nungi tasü tonga lumitsü volunteertem indefinite "Hunger Strike."
7. 4th January 1989 nung Mokokchung "Dry District" ta V.N. Gaur Deputy Commisioner-i sangdong.

(Maneni taruba adok nung....)

Khristantem amokmerener Muslim nunger ka apu



Washington, April 24 (Agencies): Facebook video ka nung Khristantem

amokmerenba Muslim Facebook nung Khristantem nunger Ehab Jaber police-i amokmeren aser pa ket nung puogo aser kiralongraba ken aliba prangpong-injangtem o nung tai tongloktsüogo. sayua liasü.

Arishi küm 45 tain Ehab Jaber ji class 5 felony Abdulmutta Jaber ji kübok ken o benok aser iba kiralongratsü amokmerenba nung pa aitsüra, pa küm 5 onük nung tai tonglokja apu, tashi tepuokdak ayutsü aser ta South Dakota Attorney sen \$10,000 senchi achitsü, Gen. Marty Jackley aser ta Jackley'er office ajanga Lincoln County State metetdaksü. Attorney Tom Wollman nati metetdaksü.

April 9, 2017 nü Sioux Falls nung ayonga agiba amshiba mozü Worldview Weekend 'methamphetamine' angu aser iba atema Minnehaha Conference nungi Ehab County State Attorney-i Jaber meindokba sülen pai balaka bushisüngdangtsü.

TEPELA LEMSATEPER



Luyong Baptist Arogo nung Kohima Ao Baptist Arogo-i 16th-19th March 2017 nübu aser rongsen tenla tulu agüja Father School takok tulu ngua katsüba sülen arogo-i follow up agiyonga arua liasü. Iba sentong medangdangi Father School nung adenertem den temolunger ajak agi nisung lir ka (41) 17th April 2017 anogo Rev. Dr. E.W. Clark apu nungi Molungyimsen yimtiba tonga Pilgrimage Walk jaja liasü. Sannüker Rev. O.Lima lenisüba küpok tesem balala nung kulisüba aser sarasadem sentong agia liasü. Iba anogo nung shi nung taneptsü anguba kuli sütepa liasü. Tatempang nung Tebu ka akhümket lesson agia sentong tempang.

Shirnoki ali rongsen aser nübu tenla agütsüogo Tsüngremi nenok tali moajangma.

Sd/-
Rev. O.Lima Pastor, LBA

Sd/-
Mr. Udang Sanglir, Secretary
Luyong Baptist Arogo.

ANOGO ABEN TSÜNGREM DEN

TEMENENPUR ASOBA

"Takarjia asü aser arem. Aser pa tasü yim nung kanga kangshia alidang pa tenük sakloka reprang aser talang nung Abraham aser pa tuko nung Lazar angu"

- Lk 16:22,23.

Tasüba ongen tsüngdang tulu tila, takar sensaker, temenenpur temeshipur ajak asoshi lapoka lir. Taochi maka tasüba pai matasar.

Alima nung temenenpur temeshipur ta jembir molumi nung temenenpur mali temeim mapa aser temeshi mapa inyaker küli süner tesa lir. Takarsang-a jangratema akümli tepiyong Tsüngrem memetet, takartem dang pa medemer liasü. Tasü yim süngküm ajanger rongseni pa doktsü, tulu, taka-taiter, medemer ajaki pa doktsü. Akümli nung pai inyakba, aliba, achiba, ajemba, ta-a to agi molumi dang aazük. Tangbo pai medizükettetsusa mi kangla nung sasüteta, pai sendokba, sempaba Lazar dang teyari meshi, aginür saka süiadoker.

Anungji tang ta alidang mapang tajung alangzükang, kechiaser Tsüngrem O-i ashir "Aser kar taküm kakat nung zülua mungura, pa molumi nung puoktsü" (J. Adok 20: 15).

SARASADEM:

Kibuba, tanü ni kü menen khu bener Nü dang; arur. Nai ni agizükang ta mepishir. Amen.

Chris Pratt-i pa indang Hollywood Star atema Laishiba tekong ka lemsatep



Los Angeles, April 24

(Agencies): Christian actor Chris Pratt-i Hollywood Walk of Fame nung petinu ka anguba atema Lashiba tekong ka lemsatepogo.

Tawa tu Chris Pratt-i Instagram nung pa indang Hollywood Walk of Fame petinu indang noksa sayu aser iba nung pai, "Tenüngsang Ken 126:3. 'Kibubai onok asoshi mapa tulu inyak, aser onok pela-a lir.' Kü alizüng sülen anidaksü atema ni ajungmesortem ajak dang kanga pelar" ta zülü.

Chris-i acting wadang nung inyaka arudang mapang shia pa indang Khristan tamang jembia rur aser ChristianHeadlines.com nung pai Yisu Khrista amangba indang jembiba osang angutsü.

Pratt aser pa kinungtsü actress Anna Faris na jabaso mapang matongdang aso aser iba mapang tena kanga shisabulu saka iba mapang pai sarasadamba ajanga pa tamang akangshi, ta paisa metetdaksü.

Pratt-i Hollywood nung nüngtugu film aika nung shilem agiogo aser film tem rongnung-Zero Dark Thirty, Guardians of the Galaxy, Jurassic World, The Magnificent Seven, Passengers, aser Guardians of the Galaxy, Guardians of the Galaxy Volume 2 lir.

Yaküm Easter Sunday nung Pratt aser par medemertemi tenemkong ka nung kangki ka mesoba noksa sayuba sülen iba osang kanga bulua prokshia liasü.

Russia nung Jehovah's Witnesses nokdanger

Moscow, April 24 (Agencies): Russia nung Supreme Court-i Jehovah's Witnesses ji extremist telok ka ta sangdongogo aser parnoki linük nung mapa kecha meinyaktsü tetuyuba agütsüogo.

Ajisüaka, Jehovah's Witnesses-i okadak ken o benoka mangadang tashi iba tenokdangba ya mapa küma metenzüktsü, ta Russian state media-i metetdaksü,

Iba tetuyuba atema Russia nung Jehovah's Witnesses otongdar, Yaroslav Sivulskiy-i ashiba agi, parnoki okadak ken o benoktsü.

"Iba maparen atema onok mepelar aser iba ya ajanga onoki

tamangba yimsü dak sendakba maparen inyakba nung tetsükdaksü ajurutsü. Onoki iba telemtetba anema ken o benoktsü" ta paisa ashi.

Taoba ita tu Justice Ministry-i St. Petersburg nung aliba Jehovah's Witnesses headquarters shibangtsü.

Russia-i talia bilemloka aoertem anema nokdakba özüng alema iba telok yagi mapa inyaker ta tai tonglokja Justice Ministry-i headquarters shibangtsü.

Russia linük nung Jehovah's Witnesses indang kongsang 395 lir aser item nung züngsem 175,000 shi lir.

OLONG PAITEP # 4402

1			2			3		4		
					5					
		6								
							7			
		8								
9										10
				11		12				
13										
14						15				

TIPILEN

1. Shimdang - (5)
3. Tatalokbatem - (5)
5. Tetenzük - (6)
6. Pei meyong aküm - (3)
7. Kilem nung atonger - (4)
8. Obalatem - (7)
9. Mekum nung _ _ _ _ - (4)
12. Nü den tambu - (3)
13. Saisapongertem - (6)
14. Sü agi yangluba lisü - (5)
15. Temadok - (5)

LANGTSÜNGLEN

1. Shiruru tebong masü - (5)
2. Ayazüa senzüba shiruru tila - (7)
3. Tajemetdak - (4)
4. Pei sasa ulua bilem - (6)
7. Sen tetong - (7)
8. Süngjang telong nung alir - (6)
10. Iba ya masü - (5)
11. Mamen - (4)


OLONG PAITEP # 4401 TELANGZÜBA

TIPILEN :

2. Orak, 4. Takang, 6. Jongdak,
8. Kok, 10. Temenen, 11. Alen,
12. Ila, 14. Süngden, 15. Tzüküm,
16. Omen.

LANGTSÜNGLEN :

1. Tangsem, 3. Atak, 4. Tejembinü,
5. Tekongnem, 7. Anünü,
9. Nangzük, 13. Asem.



Tesayur-i Alokba dang class nung lesson asüngdang

Tesayur : Tanurtem...tanubo asenok Englishi subject nung ni nenok dang English lesson kar asüngdangtsü...anungji nenoki langzüksü renema liang noo... tamasa Alokba-i nai meteta aliba English kar jembia sayuangjo....

Alokba : O.k. Sir...Hiii...Shut up your mouth....You baasstaarrt....you bloody Fool... you monkey girl ... I hate you.... I'll give you a punch....I'll give you a kick... no money no fuunnyy.....whisky brandy is my darling....haa...haa...hooo...

Tesayur : Ayyyaaa...Alokba na iba amala English o tajung paikati kong kong nungi angazüker jembir'ar shiangjong....???

Alokba : Sir..... Ena obala aonung shia English mozü jemer kidangi shilanger.... aser pai teti item English 'O' ya jembia ojala onok ajak den merenshir.... ni iba English 'O' ya obala nungi angazük adii....

Tesayur : Waaa...!!! Nübu-i ajemba mozüji kodaser nai English mozü-a ta metet ???

Alokba : Sir.... Kodang obala iba mozüji jemdir pai teti English kanga jembir adii... anungji ni aji English mozü asütsü südi ta bilemer...hii...hiii...hoo....

-L.Kika Pongener,Aoyimküm,Dimapur.

TANÜBO NAI LANGZÜANG

Q. MGNREGA nung tetsür shilem kwi shii shilem agir

- 1) 55%
- 2) 50%
- 3) 45%
- 4) 40%

(Taruba adok nung onoki langzüksü)

YASHIADOK TELANGZÜBA : Madhya Pradesh

Tepela Tasoba Anogo



Tanur asoba anogo nung salem osang den noksa angat adokdeksünüra - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jela e-mail : tiryimim@gmail.com nung yokang mesüra Tir Yimiyim bureau tem nung agüjang.

1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAIA YA METETER MA

Playa Puerto Nuevo tzüküm



Tzüyim nungi tenem alema tzüsem adoka tzütu nung alua tsükba noksa nung angur.

Playa Puerto Nuevo tzüküm ya Puerto Rico nung aliba tzükümtem rongnung tesüngmangtsü aketba tzüküm ka lir. Iba tzüküm ya San Juan nungi minute 45 shi pilar aliba Vega Baja nung lir aser iba tesem ya kanga tobur tajung. Iba tzüküm dang ya 'Balneario of Vega Baja' mesüra 'Balneario Puerto Nuevo' taa ajar aser ibai nisung ajak asoshi tesüngmangtsü aketba tzüküm ka lir. Iba tzüküm nung tesem karbo kanga tesüngjem aser jungrara. Ajisüaka tzüyim jakdang tenem ka aliba nung longtemji kanga tanüla. Tzüyim nungi tzüsem adoka tenem alemdanga aruba tzüji metre 15 shi asür aser iba tzüji tenem jakdang tzütu nungji alua tsüker. Iba tzütu nung kazüdang akok tashi tzu kanga malilen kazü tajungba kechiba süra iba tesem tobur tajung süaka yangi taküm aika samaogo.

SUDOKU # 3515

TELANGZÜBA # 3514

		8		2		6		3		6	3	1	7	2	4	5	9	8
	2	1		3						7	8	9	5	6	1	4	2	3
		9		5	8			1		2	4	5	8	3	9	6	7	1
					4	3	9	1		5	2	8	4	9	3	7	1	6
						2	8			9	6	4	1	7	2	3	8	5
9		3	8	7			6	5		1	7	3	6	8	5	2	4	9
5	9	2	6	8		1	7	4		3	5	7	2	1	8	9	6	4
1		4	2			8				4	1	2	9	5	6	8	3	7
				1	4	7		2	9	8	9	6	3	4	7	1	5	2

OJANG LUTEP # 4007

- ISHA : □□□□
- TMEETA : □□□□□□
- TEALIRMIA : □□□□□□□□
- AENS : □□□□
- MLIA : □□□□
- AJTSUNGÜ : □□□□□□□□
- OSASHI : □□□□□□
- HKECA : □□□□□□
- AKBALA : □□□□□□
- MYAKEINER : □□□□□□□□

OJANG LUTEP TELANGZÜBA # 4006

KIBONG NUNG APUANI NA OBANG KA ASÜNUNG DANG TAKOK ANGUR

Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdangang (Horoscope):

- 

Aries
21/3-19/4
Nü dak temolung alemba aser tejangrabatem aliba ajanga na aiben lendongi aitsü. Anungji tanü nü mapa nung mapang agiang aser kümdanga inyakang.
- 

Taurus
20/4-20/5
Nai mapa nung temolung agüja inyakba ajanga tangar den külemi meinyaknüi bilemstsü. Saka nü yimya melenshiang aser tangar den külemi inyakba ajanga takok angutsü.
- 

Gemini
21/5-20/6
Na lokti nisung ka asünungpo nai tangar den külemi mapa inyaktsü meteta lir. Anungji tangar nungi na shisatsü agiang aser iba ajanga na ajangzüksü.
- 

Cancer
21/6-22/7
Nür kibong asoshi nai kanga bilemer. Nü mapa nung mangatettep kar adokra nai kinunger tsüngda nung shisa agiba ama parnok dena nü khurettem lemsatepang.
- 

Leo
23/7-22/8
Telok nung nai mapa takok ngunüra nükjitong tulu yuang. Lenir ka akümtsü atema sempet aser mapang peria nungdaker. Aser nai taküm nung temelenshi agizüktettsüla.
- 

Virgo
23/8-22/9
Tangar den külemi mapa inyaktsü asoshi masü saka tangari nüden külemi inyaktettsüsa nai sentong yanglutsüla. Kisung-i inyaktsü aliba mapa nung meranglok tajungba asütsü.
- 

Libra
23/9-22/10
Nü sempet aser nü mapa meputepi alitsü südi. Saka nai item ajak koktetsü asoshi tangar nungi shisatsü agitsüla aser kümdanga inyaksangshitsü nungdaker.
- 

Scorpio
23/10-21/11
Tangari na ajungshiba nai tai nung angatetra na asoshi takoksa asütsü aser lendongi aiben aitsü. Nü mapa nung takok angutsü asoshi nai parnok o angadangsüla.
- 


Sagittarius
22/11-21/12
Tenüng atema mapa tilaka inyaker anisüngzüka alitsü bilemra nü mapa nung terenlok malitsü. Anungji nai nü mapa nung temolung agütsüshiang.
- 

Capricorn
22/12-19/1
Na mapa inyakba tesem nung temaba jenjangi atutsü asoshi kisung bilema inyakra nai nü mapa jangratema mebilemstsü. Anungji nü mapa nung temolung agütsütsüla.
- 

Aquarius
20/1-18/2
Na meketa aliba nisung aikati nüden ochi shia sensaksem malir aser iba ajanga timtem adoker. Anungji nai mapa ka nung takok ngunüra iba mapa nung rangloker jembishinüang.
- 

Pisces
19/2-20/3
Nai angatetba aser nai bilembatem medemertem den lemsatepang. Iba ajanga nü mapa nung takok angutsü aser tangari na metettsü.

Kalpana Chawla taküm otsü film nung Priyanka-i shilem agitsü



Priyanka

Kalpana Chawla

April 24, 2017 (Agencies): Astronaut indang taküm otsü film yanglutsüba sentong taruba film 'Baywatch' yanglu tenzükogo ta sangdonga ajungketba aser 'international show' balala nung shilem agia senzüdar. Osang ajang ashiba agi, Priyanka yakta astronaut, asür Kalpana Chawla taküm otsü film yangluba nung shilem agitsü. La Bollywood film nung shilem agiba tatembangbubaji 'Jai Gangaajal' film liasü, koba yaküm küm tetenzük nung saya. Kasa osang ajanga ashiba agi, Chopra aser lar telok iba 2016 küm Viacom 18-i

project nung küm ka shi shilem agia arudar. Script dena renemer aliba osang parnoki metetdaksü. Iba film direct asütsü alisang, Priya Mishra-ia iba osang jangjashitsü. "Ni iba film atema taoba küm 7-shi inyaka arudar. Production company tasen ka ajanga iba film ya yanglutsü," ta Mishra-ia sangdong ka nung metetdaksü.

Chawala ya 1962 küm March ita Karnal, Haryana nung aso. La kaket shisatsü bushi tenzükang, Tagore Bal Niketan School nung azüing aser Punjab Engineering College, Chandigarh nung aeronautical engineering renema azüing. La 1982 küm US-i ao aser 1988 nungi NASA den inyak tenzük. Chawala 2003 küm February ita parnok mena aliba space shuttle, Columbia nung mi adoka asü. Parnok anüngtom nung space station nungi meyipa aludang iba lendong ataloka liasü.

Sonakshi Sinha aser Armaan Malik na o langtep

April 24, 2017 (Agencies): Sonakshi Sinha aser Armaan Malik na actor temi kentener amokbangba dak sendakba nung Twitter ajanga o langtepa liasü. Iba tatalokba ajanga India nung kentenba sentongtem nung temelenshi bener arutsüba tuteta sayuogo.



Sonakshi Sinha

Armaan Malik

Nüngtugu kentener Sonu Nigam-i social media ajanga kanga dang tapet onük ka nung ken o benoka lemsatepba sülen ano kentener kati actor temi kentenba sentong nung kentenertem amokbangba dak sendakba onük ka benoka liasü.

Tawa iba ajanga kentener Armaan Malik aser actress Sonakshi Sinha-na Twitter nung mangatettep tilaka adoka liasü.

Justin Bieber India nung kentenba sentong nung Sonakshi Sinha-i shilem agitsüba dak sendakba nung Armaan-i tweed asüba nungi iba mangatettep tenzük liasü. Armaan-i yamai zülutsü, "@Kailashkher sir!-i pa tebilemba lemsatepba nia agizüker. Actor temji actor aser kentenertemji kentener lir. Kentenba sabang aser mic onok atema tokjang, ibaji nenok indang masü saka onok meyong lir."

Iba olen nung Sonakshi-i yamai telangzüba agütsü. "Kentener kati tanga kentener

ka parnok sempet arangtetshiba aser parnok nükjidong atongtsü asoshi ajungshitsüla. Art ji kechi südir süaka ajungshitsüla."


Maneni Armaan-i iba nung telangzüba yamai agütsü. "Sonakshi, ni nü den hai haora akar, saka linük nung actor tem dang nungi kentenertem mesükshiba aser kanga tongtubang süa mamshiba indang kü tebilemba shidanger."

Iba telangzüba ajanga Sonakshi mepelai yamai telangzüba agütsü. "Nai nü atema kü nem ken tendaktsünüba denbo iba onük ya meputeper." Aji saka iba onük nung Sonakshi-i Armaan ya pa teti, ken mejemer Amaal Malik den aitepba amai reprangteter.

Iba o langtepba ajanga linük nung music industry nung

temelenshi bener arutsüba sayur, kechiyong actor tem film tem nung parnok shilem atema parnoki dang kentenba ajanga lanur kentener aika maongka mongoi akümer. Iba dak sendakba onük nung Kailash Kher-i pa tebilemba mezüing lemsatepa liasü. Pai interview mapang ka nung yamai ashi, "Ni Canada nung kentener Justin Bieber India-i arudang Sonakshi-i iba nung shilem agitsü ta tesem ka nung züngshi. Osangji kanga dang tanganütsüka saka iba ajanga tanga linüki osang tai belenshitsu."

Pai maneni ashiba agi, bendanglen alirtemi Sonakshi-ji India nung nüngtugu kentener ka ta belimtsü saka labo actor ka lir. Iba ajanga India nung kentenertem tajemba jenjangi anir alutsü.



Los Angeles, April 24 : 20th Century Foc studio ajanga 'Deadpool 2' ya 2018 küm June 1 nung sayatsü, ta sangdongogo. 'Deadpool 1' nung ama iba movie nung Ryan Reynolds-i tongti shilem agitsü aser Josh Brolin-a 'Cable' tenüng nung shilem agitsü. Iba movie ya taküm küm June ita nungi tenzük tangoktsü yimlar.

TAN HOPTA ATEMA - KOMA SÜLA ?

Q. Taruba election nungbo constituency shia nung political party aser Independent party shia Fund Raising Committee shima candidate yari nunga koma süla?

Olong 20 shi nung April 28, 2017 tashi nung iba telangzüba ya onok dangi

e-mail - tiryimyim@gmail.com mesüra SMS - 9856121232 / 9436072422 mesüra Tir Yimyim Facebook account ajanga yokang. Telangzübatemji taruba Hokolbar nü adoktsütsü.

Kamal Haasan-i Bigg Boss Tamil nung host asütsü May 16 nü Maruti Suzuki Dzire



April 24, 2017 (Agencies): Küm 50 shi film balala nung kanga takok ngua shilem agia arur nungtugu actor Kamal Haasan-i TV show ka nung

shilem agitsü asoshi renemogo. Pa Bigg Boss Tamil nung host ka ama shilem agitsü. Tawa osangbenertem den jembidang pai iba osang jangshitsüa liasü.

"Ni Bigg Boss Tamil nung shilem agitsü. Ni entertainer ka ama shilem balala aika agia aruogo saka television show nung host ka ama kodanga shilem magidang. Ni iba nung shilem agiba ya komaar metetner," ta Haasan-i ashi.

Paisa ashiba agi, pa mapa ana tashi nung shilem agitsü asoshi renema lir, anungji show indang anogotem tang yanglua aliba sentongtem den metsükteptsüa yangluogo.

"Ni tetsüng raksaba ajanga ita 8 tashi masemteti liasü. Ni

tangbo comedy, Shabash Naidu aser Vishwaroop 2 na külemi inyakdar aser Bigg Boss show indang anogotem ya tanga mapatem den metsükteptsüa yangluogo," ta paisa ashi.

Bigg Boss Hindi nung Salman Khan shilem indang asüngdang dang pai yamai langzü, "Salman Khan-i iba sentong nung shilem agirtem den kanga junga sendaktepteter. Pai lenmang sayur ka ama masü saka medemer ka ama parnoknem tajungshiba agütsür. Nia pa ama iba show nung shilem agirtem den sendaktepteter saka parnokni ni lenmang sayur ka ama mesüra medemer ka ama agizükter, iba dakji keta lir."



April 24, 2017 (Agencies): Maruti Suzuki-i parnok indang gari 'Dzire' sayuogo. Iba gari ya India nung iba mesükba gari rongnung timtiba yoka lir. Dzire ya Suzuki indang B-platform tasenba nung Swift tasenba den külemi yangludat.

Dzire ya sub-4m sedan dang asütsü, saka Maruti Suzuki-i 20m agi wheelbase ajungketogo, koba ajanga tang aliba gari dang nungi cabin space tali alitsü imlar. Dzire tasenba tejaklen airbag ana aser ABS densema lir. Swift Dzire jtasenba indang Boot space 376-litre lir aser tejenba

gari dang nungi liter 60 agi talila lir. Dzire tasenba ya tesatempa aser tepongpaba lir. Taoba Dzire gari dang nungi seret 85 agi tajemba lir.

Sub-4m sedan gari indang engine ya taoba gari den kasa dang lir. Petrol atsükba atema 1.2-litre engine aser diesel atema 1.3-litre engine lir. Dzire diesel engine ajanga tashi 190Nm agütsütsü. Petrol aser diesel gari-na prongla nung 5-speed manual aser AGS transmission keta lir. Dzire V variant nungbo AGS transmission keter angutsü.

Dzire ya grade pezü nung angutsü- L, V, Z and Z+. Maruti Suzuki-i Dzire tasenba 2017 May 16 nü sayatsü asoshi renema lir aser iba gari shishilembadak Tata Tigor, Ford Aspire, Honda Amaze, Volkswagen Ameo aser Hyundai Xcent amala gari den tokteptsü.

Sen 51,990 jenjang LG G6 smartphone India nung sayaogo



New Delhi, April 24 (Agencies): South Korea nung electronic yangluba company, LG ajanga India nung G6 smartphone sayaogo. Iba phone jenjang ya sen 57,990 lir. Tang atemabo iba smartphone ya Amazon.in nung dang angutsü.

Tawa sen 57,900 jenjang Samsung Galaxy S series saya lir aser iba smartphone den LG G6 ya tokteptsü.

Mobile World Congress 2017 February ita aliba mapang LG G6 ya sayua liasü. Iba phone indang display ya 5.7-inch QHD+ (2,880x1,440 resolution) FullVision aser smartphone rongnung mezüngbuba screen aspect ratio 18:9 ji iba phone ya lir.

HDFC mesüra SBI credit/debt card ajanga jelia iba smartphone müka yura sen

7,000 meyiba angutsü.

Game asayar asoshi G6 Game Collection sentong ka densema lir aser sen \$200 jenjang Temple Run 2, Spider-Man Unlimited, Crossy Road, SimCity BuildIt, Cookie Jam aser Genies & Gems game tem ya Google Play nungi angati agizükteptsü maongka angur. Iba phone nung ya 'game battery saver' keta lir.

LG G6 tesülen ya dual 13MP camera aser 125-degree lens lir. Tejaklen aliba camera ya 5MP aser 100-degree field view keta lir. Iba phone nung tzü aser aoyi mamongtsü asoshi IP68 inoka lir aser tzü metre 1.5 tarok nung minute 30 tashi metena yuaka meraksar. LG G6 nung ya Google Assistant keta lir.

LG G6 smartphone ya April 25 nung alira sen 10,000 meyiba

agütsütsü; Reliance Jio ajanga 2018 küm March ita tashi asoshi 4G data 100GB agütsütsü aser sen 309 agi recharge asüba shia 10GB data tali agütsütsü.

LG G6 smartphone nung keta alibatam yamai lir:

* 5.7-inch 18:9 QHD+ FullVision Display (2880 x 1440 / 564ppi)

* 4GB LPDDR4 RAM/32GB mesüra 64GB UFS 2.0 ROM/MicroSD (2TB tashi amshitetsü)

* Tesülen camera - 13MP Wide (F2.4 / 125°) / 13MP Standard OIS 2.0 (F1.8 / 71°)

* Tejaklen camera - 5MP Wide (F2.2 / 100°)

* Battery - 3,300mAh (embedded)

* Operating System - Android 7.0 Nougat

* Tasazük - 148.9 x 71.9 x 7.9mm

* Tuozük - 163g

* Network - LTE-A 3 Band CA

* Connectivity - Wi-Fi 802.11 a,b,g,n,ac, Bluetooth 4.2 BLE, NFC, USB Type-C 2.0

* Sentsü - Astro Black, Ice Platinum, Mystic White

* Tanga features tem - Water & Dust Resistant, Fingerprint Sensor, UX 6.0, Dolby Vision, HDR10, Qualcomm Quick Charge 3.0, 32-bit Hi-Fi Quad DAC



Chennai, April 24: Chennai nung Ashok Leyland Global Expo 2017 aliba mapang Ashok Leyland mendenbuba, Dheeraj G Hinduja (achichi), aser Ashok Leyland indang CEO aser Managing Director, Vinod K. Dasari (abelen) külemi tangokba noksa nung angur. Ashok Leyland ya Hinduja Group indang kongsang ka lir aser India nung shishilembaba oset abenba gari yanglur rongnung tanabuba jenjang nung lir. Tanü Global Conference sentong nung parnok-i yanglua aliba gari 30 sayuogo.

Double-decker AC train July ita amneloktsü

New Delhi, April 24 (Agencies): Indian Railway-i July ita Utkrisht Double-Decker AC Yatri (Uday) Express sayatsü. Iba train ya aonung senzütsü aser iba train nung senzüner passenger akia aliba lenmangtem nung senzütsü.

Iba train nung senzürtem anisüngzüka amentsü asoshi 'reclining chair' tem inoka lir. Train nung passenger 120 senzütetsü aser parnok atema automatic chiyongtsü aser süngo/cold drink vending machine inokja lir.

Uday service ya Delhi-Lucknow amala lenmang nung senzütsü aser train nung senzütsüba taa, mail/express train 3AC class nung meshiba dang nungi tajemba asütsü.

Maneni coach shia nung Wi-Fi speaker system dena LCD screen tulu inoka angutsü.

Double-decker Uday indang USP ajanga passenger temnem 3AC asoshi agütsüba taa dang nungi tajemba nung parnok

anisüngzüka senzütsü asoshi facilitie tajungba agütsür, ta Railway Ministry nung ketdangser kati ashi.

Train nung khu shilem 40 agi tali bentetsü aser iba ajanga 'public transporter' temnem anisüngzüka agütsütsü.

"Aonung senzüba train süaka iba nung sleeper berths malitsü, aji saka passenger tem anisüngzüka senzütsü asoshi facilities aika bendenloka lir," ta ketdangserisa ashi.

Maneni train nung passenger tem anisüngzüka mendaktsütsü asoshi menden kanga junga yangluba den külemi tetsüng ayutsü asoshi sadema doktsüa lir. Iba dak alaka train nung 'bio-toilet' inoka lir.

Chiyongtsü dak sendakba nung reprangdangra coach shia nung food vending box ajanga chiyongtsütem agütsütsü.

Iba train yanglutsü atema 2016-17 rail budget nung sangdonga liasü aser iba train yagi gondha shia km 110 jackettsü.

BSNL-i sentong tasen saya, sen 333 agi 270GB data angutsü



New Delhi, April 24 (Agencies): Reliance Jio indang 'Dhan Dhana Dhan' sentong den tokteptsü asoshi sorkar meyong BSNL ajanga sentong tasen agütsür.

BSNL ajanga sentong tasen asem sangdongogo aser item sentongtem ajanga 3G mobile internet 270GB aser anogo 90 atema tanen makai jembitettsü.

Sen 333 indang 'Triple Ace plan' nung BSNL-i anogo 90 atema 3G data anogoshia 3GB agütsütsü. Iba plan ajanga ita ka nung 3G data 90GB aser ita asem asoshi 270GB agütsür.

Sen 349 indang 'Dil Khol Ke Bol' sentong nung tanen maka local aser STD den jembitettsü aser anogoshia 3G data 2GB agütsütsü. Iba sentong ya anogo 90 asoshi lir.

Sen 395 indang 'Nehle pe Dahla' sentong nung anogoshia 2GB data agütsütsü aser BSNL network den minute 3,000 angati jembitsü agütsütsü. Iba sentong nung tanga network den angati jembitsü asoshi minute 1,800 melar aser iba sentong ya anogo 71 asoshi lir.

Ita 2-3 tsüngda J&K tensa ajungtsü: Mehbooba Mufti



Srinagar (Jammu & Kashmir), April 24, 2017: Hombarnü Srinagar nung kaketshirtem aser longkak aitertemi security sepaitem indang gari dak long onloktsüba noksa nung angur. Pulwama nung sepaitemi college ka mita reprangba sülen April 15, 2017 nungi tenzüka kaketshirtemi longkak aita sepaitem den raraa arur.

New Delhi, April 24 (Agencies): Tanü Jammu & Kashmir Chief Minister, Mehbooba Mufti-i, taruba ita ana-aseem tsüngda Jammu & Kashmir tensa tajungba akumtsü, iba sülen ken o jembitettsü, ta metetdaksü.

Tamalen senden ka amendang Mehbooba-i Ato kilonser, Narendra Modi dang taoba mapang Ato kilonser, Atal Bihari Vajpayee-i Kashmir atema benokba mapatong lepshia separatist

telok den ken o jembitsü atema süoka jembii.

New Delhi nung Union Home Minister, Rajnath Singh den senden amenba sülen osangbenertem den jembidang Mehbooba-i, "Taruba ita 2-3 ji onok atema kanga tongtibang asütsü. Iba mapang tashi nungbo nenoki Jammu and Kashmir tensa melenshiba angutsü. Onoki yimjung atema tama inyaksü aser iba sülen ang ken o jembitsü atema ketdangsüa inyaksü," ta ashi.

Laisa, ken o jembitsü atema Centre sorkari temaba jenjang nung telemtetba ka agitsüsa akumtsü, ta metetdaksü.

Iba senden nung state BJP general secretary incharge, Ram Madhav-a densema liasü aser Mehbooba-i tena dang Kashmir tensa indang metetdaksü.

State nung Tir yimsüsüba benoktsü asü, ta osangbenertem asüngdangba langzudang lai, iba telangzübaji Centre sorkari dang agütsütetsü, ta ashi.

Nashi nem Unique identification number agütsütsü benok

New Delhi, April 24 (Agencies): Centre sorkari linük nung nashi shia nem Aadhaar mesükba, unique identification number agütsütsü atema benokogo.

Centre-i iba temepishibaji Supreme Court nem agütsüogo. Supreme court nem agütsüba osang nung Centre sorkari, "India nung nashi shia aser parnok chanutem shia 'tracking' atema Unique Identification Number kaka agütsütsüla," ta shia lir.

Centre sorkarisa, nashi kati mamatzü agütsüba mapang tembangba sülena parnok junga anepalutsü atema benok.

Centre-isa nashi kümzükba aser India-Bangladesh arrtsülen ozüng alema nashi shibelenba onüka metetdaksü.

Home Ministry nung Joint

Secretary-i aniba committee kati benokba onüktem nung ajemdaker Centre-i item temepishibaji SC nem agütsü.

Centre sorkar osang nungsa, district shia nung kibur maliba shururu tajemba agi 500 bo jenokdaksütsü atema 'tejenokdak ki' kaka yanglutsüla, koba ajanga linük adena ozüng alema shiruru shibelenba nokdangtsü, ta ashi.

Tamalena osang ka nung Animal husbandry department-i technician tem dang nashi tenarong shia nung züngya 12 (digit) aketba unique identification number inoktsütsü tuyua liasü.

Osang angazükba agi, technicians lakh ana shi nem tablets 50,000 agütsüogo aser parnok mapaji nashi shia tenarong nung polyurethane tag

kaka inoktsütsü atema lir.

Wakong sentsü tag ji nashi tenarong tiyongtsü nung inoktsütsü.

Item tag shiaji sen 8 lir aser tepungba lir. Tag ji nashi tenarong nung inoktsüba sülen technician temi tablet ajanga online database nung iba number ji agütsütsü aser shiruru kibur nema 'animal health card' agütsütsü.

Ato kilonser, Narendra Modi-i benokba digital mapatong den külemi Centre sorkari taküm kümsa nashi aser jang million 88 nem Unique Identification Number agütsütsü nükjijong lir.

Item tags, tag applicators, tablets aser health cards alitsü atema Centre-i sen crore 148 lemküttsüogo, ta ketdangser kati metetdaksü.

Sorkari Hindi mebenoker, saka ajungkettsür: Rijiju

New Delhi, April 24 (Agencies): Tanü Centre sorkari, onoki Hindi oshi kangshia mebenoker saka tanga regional oshitem ajungkettsüba ama Hindi oshia ajungkettsür, ta metetdaksü.

New Delhi nung osangbenertem den jembidang Minister of State for Home Affairs aser Department of Official Language nung minister in-charge, Kiren Rijiju-i, "Onoki Hindi oshi mebenoker saka tanga regional oshitem ajungkettsüba ama Hindi oshia ajungkettsür," ta ashi.

Hindi oshi mejembiba state tem nung Narendra Modi'er sorkari Hindi oshi benoktsü meranger, ta aikati ola adoka aitsüba mapang ka nung minister-i iba o ya jembio.

DMK lenir, M K Stalin-i, India linük ya Hindu linük ka kümdaktsütsü atema Centre sorkari Hindi oshi mejembirtem matsüngdang Hindi oshi benoker, ta aija liasü.

CBSE aser Kendriya Vidyalaya school tem ajak nung Hindi oshi agitsü atema Tiri agizükba anema Hindi mejembiba state temi, Centre-i tanga oshitem nokdang, ta aitsüogo.

Trinamool Congress lenir, Saugata Roy-ia, iba telemtetba ya BJP-i par onük, 'Hindi, Hindu aser Hindustan' benoktsü nükjijong nung inyaker, ta aitsü.

March 31, 2017 nü Tiri tetuyuba ka ajanga HRD ministry dang Hindi compulsory agitsü atema inyakang, ta metetdaksü.



Ajmer (Rajasthan), April 24, 2017: Lisem lima state, Rajasthan joko tali tatsükba akumba mapang ka nung state kübok Ajmer nung alir kati tzü temekong rizünga ayutsü atema alichipo yangludenba noksa nung angur.

Mitkar dak sen timba indokba jenjang 5buba nung India lir

New Delhi, April 24 (Agencies): India-i 2016 küm mitkar dak sen indokba shilem 8.5 agi timba aküm, aser India-i mitkar dak US sen billion 55.9 indoka alima nung jenjang pongububa kümogo, ta Stockholm International Peace Research Institute (Sipri) ajanga metetdaksü.

Kasa osang ajanga ashiba agi, mitkar dak sen timba indokba mezüngbuba jenjang nung US lir, aser parnoki 2015 aser 2016 küm tsüngda mitkar

dak sen billion 611 indoka liasü. US sülen tanabuba, tasembuba aser pezübuba jenjang nung China, Japan, South Korea aser Australia linüktem lir.

Kasa mapang nung China-i mitkar dak sen billion 215 indok aser Russia-i sen billion 69.2 indoka liasü.

Mitkar dak sen timba indokba temaba jenjang 15 nung Pakistan bo densema mali. Kasa mapang nung Pakistan-i mikar dak sen billion 9.93 indoka liasü.

J&K nung PDP lenir Abdul Dar kaset

New Delhi, April 24 (Agencies): Kiralongrartem hospital, Srinagar, Dr Nazir Chaudhary-i ashi.

Osang angazükba agi, Gani dak teku nung injang zübu liasü. Dar ya 2014 küm November 1 nü PDP nung aden, ibaji masüadang pa Congress Party nung inyaka liasü.

Taoba hopta ana tsüngda telungpurtemi pa dak injang khaloktsü," ta police ketdangser kati ashi. "Pa Srinagar nung aliba SMHS hospital-i anir ao, ajisüaka injang agi yiruba nungi mezükümzükte asü," ta ketdangserisa ashi.

"Pa tasü bener aru," ta

Medical Superintendent SMHS hospital, Srinagar, Dr Nazir Chaudhary-i ashi.

Osang angazükba agi, Gani dak teku nung injang zübu liasü. Dar ya 2014 küm November 1 nü PDP nung aden, ibaji masüadang pa Congress Party nung inyaka liasü.

Taoba hopta ana tsüngda telungpurtemi tang agi tanaben PDP lenirtem anema inyaker.

Jammu & Kashmir Chief Minister, Mehbooba Mufti-i Ato kilonser, Narendra Modi aser Union Home Minister, Rajnath Singh na den senden amenba mapang ka nung iba ya atalokogo.



Tawa asentenshiba Squadron, "THE VALIANTS" nung SU-30 MKI tayimtsü inoksemba nungtem nung tanü April 24, 2017 nü New Delhi nung Water Cannon Salute agütsüba noksa nung angur.



Yirusalem, April 24, 2017 : Küm shia Yad Vashem Holocaust memorial nung amungba 'Holocaust Remembrance Day' nü 'siren' ola angashidang Israel Ato Kilonser Benjamin Netanyahu (abelen), Tir Reuven Rivlin (abeneln nungi 2buba) aser Republic of Austria nung Federal Chancellor, Christian Kern (achiji nungi 2buba) nunger nokdaka asürtem nem akhümsü agütsüba noksa nung angur.

Singapore: Sen külakzüka agir India nunger 5 tepuokdaki yok

Singapore, April 24 (Agencies) : India nunger nisung pungui January 2015 nungi yaküm May ita tashi nung Goods & Services Tax (GST) refund ajanga Singapore dollars 167,253 (US \$120,422) külakzüka agiba atema Hombarnü tepuokdaki yokogo, ta osangbenertemi ashi.

Arishi küm 29 tain, Kothandaraman Gnanam, arishi küm 32 tain, Karunanidhi Rajesh, arishi küm 44 tain, Ramaiyan Karthikeyan aser arishi küm 61 tain, Waithiyalingam Karunanidhi nunger küm asem ser ita asem tepuokdak ayutsü obendang angu.

Parnoki den yariteper, arishi küm 37 tain, Karunanidhi Saravanan-a küm asem ser ita ana tepuokdak ayutsü, ta osangkaket nung shia lir.

Item nisungtem dang Singapore dollars 14,000 (\$10,080) aser Singapore

dollars 70,000 (\$50,400) senchi chiogo. Ano mapa tamajung inyakba asoshi parnok nisung shi dang nungi Singapore dollars 51,952.71 (\$37,405) senchi achi.

Ashiba agi item nisungtem yagi GST refund angutsü temeten maliba, Singapore nung telidak nisungtem aser mapa inyaksü pass bener alirtem ket nungi cash memo aser jewellery tags alitsü asoshi Little India nung aliba jewellery dokan maitsüi liasü

Parnoki item customer tem dang nungi cash memo sen kwi agisa ali iba osangjibo ano memettdaksü.

Raliwalirtemi Singapore semdang toktsür aoba mapang parnoki Singapore nung aliba osettem atema GST refunds meshia agiteter. Parnoki GST nung züngsema aliba retailer tem ket nungi aliba osettem asoshi receipt aser eTRS ticket angur.

Item raliwalirtem linük toktsüba mapang parnok ngua aliba eTRS ticket ji amshia GST refund meshia agir.

Item nisung pungu yagi parnok indang passport aser linük toktsür aodang amshiba card (white embarkation cards) tem den parnoki alizükba cash memo tem amshia dokan tem nungi eTRS tickets agizüker, iba sülen parnoki cash memo tem, jewellery tags aser eTRS tickets ajakji putepa yanglur, ta kasa osang ajanga ashi.

Karunanidhi Saravanan-i parnoki nem pai wholesale agi aliba jewellery tem amshidakja sen meshia agidaktsüba nung yarir, ta osang ajanga ashi.

Item nisungtem ya Inland Revenue Authority of Singapore (Iras) nungi bushisüngdangertemi February 01, 2017 nü apu.

Hokolbarnü item nisung pungu yagi GST 14 ben tashi agizüka agiba tai nangzük.

Palestine tsür kati Israel nungi tetsür sepia ka dak kotari agi aset

Jerusalem, April 24 (Agencies) : Tel Aviv nung Palestine nunger tain longlong kati kotari agi nisung pezü yirutsür anogo ka lir külen ano West Bank checkpoint nunga Palestine tsür kati Israel nungi tetsür sepia ka dak kotari agi

aset, ta police-i ashi. Iba lendong ya Yirusalem anüdoklen, Kalandia checkpoint nung atalok, ta osang ajanga ashi.

Police otongdar, Luba Samri-i iba tetsürji Ramallah yimti nungi arishi küm 39 tain ka lir ta

tenüng memettdaksü ashi.

Iba tetsür jagi tetsür sepia ka dang langka asüngdangner ta ashi. Ibaji shilii lai la yangkhu nungi kotari ka agiteter la dak setoktsü. Iba tetsürji indangjisa apu aser asüngdangyatsü asoshi anir ao, ta Luba Samri-i ashi.



Coin, April 24, 2017 : April 23, 2017 nü Spain anüolentip tsütsü Malaga anasa Coin nung airsoft game asayartemi US-i aniba telok ama asayartem anema Islamic State telungpur amai raraba sülen tangokba noksa ka yangi angur. Iba asaya nung merang injang mamshii airsoft guns amshia asayar.

France: Le Pen aser Macron anema longkak aيتدang nisung 6 asü

Paris, April 24 (Agencies) : Paris nung Tir election mezüngbuba shilem osang sangdongba sülen longkak aitiba mapang security asem dena nisung trok asü, ta Hombarnü police-i metettdaksü.

Leftist party nungi activist temi independent centrist candidate Emmanuel Macron aser far-right National Front lenir Marine Le Pen na anema longkak aitiba mapang police-i nisung 29 pua ayu. Emmanuel Macron aser Marine Le Pen naprong May 7, 2017 nü election maongka nguteta lir, ta police-i osangbenertemi dang ashi.

Activist temi Paris tiyong nung aliba Place de la Bastille aser Place de la Republique na nung polling atemtsü ghonda ana jilia adenshir longkak ait meso.

Mezüng parnoki shinga maittetsüsa nisung agi atsi atsi, ajisüaka kodang Macron aser Le Pen nati takok anguba osang angashi longkak aitertemi kanga sashia apusotsü tenzük.

Nisung aikati mi narotem tsükloker mereploktüdang gari aser dokan tem aika raksatsü.

Iba den külemi ano Toulouse, Lyon, Bordeaux aser Grenoble tesemtem nunga activist temi longka kanga sashia aita liasü.



April 24, 2017 nü Nay Pyi Taw, Myanmar nung 'Joint Implementation Coordination' senden amenba mapang Myanmar State Counselor, Aung San Suu Kyi-i jembiba noksa nung angur. Myanmar-i '21st Century Panglong Peace Conference' tanabuba shilem May 24, 2017 nü Nay Pyi Taw nung anogo pungu nü akatsü lemteta ayu.

Africa linük 3 nung mezüngbuba malaria vaccine agütsütsü

London, April 24 (Agencies) : World Health Organisation (WHO)-i, Africa kübok Ghana, Kenya aser Malawi linüktem nung mezüngbuba malaria vaccine 2018 küm nungi tenzüka agütsütsü, ta Hombarnü sangdongogo.

RTS,S vaccine yagi temang nung tashidak den raraba mesen (immune system) dang merilai metepba ajanga prokshiba, malaria mesen den raratsü tesayuba agütsür, ta WHO-i ashiba osangbenertemi metettdaksü.

Iba vaccine ya pezüben agütsütsü nüngdaker -- ita asem nung khen khen aser pezübubaji ita 18 sülen.

Iba mozü ya kanga azüoka aliba aser tetendangba junga agiteta tesemtem nungang takok ngua inyakteter, anungji temang anepaluba tesem nung takok ngua inyaktetsü meinyaktetsüar ashitsü makok, ta WHO-i ashi.

Anungji UN-i linük asem nung iba malaria vaccine tenzükttetsü metenzükttetsüar kanga junga tendangdar.

Parnoki iba vaccine tashi aser meraksai yutettsü meyutettsü itemjia asadangtsü, ta osang ajanga ashi.

Africa atema WHO nung regional director, Matshidiso Moeti-i: "Tang malaria tashidak asoshi amshia aliba mozütem den külemi iba vaccine agisemba ajanga Africa nunger nisung meyrjangsa meyrjang taküm kümzüksü, ta ashi.

Iba vaccine agütsütsü asoshi Ghana, Kenya aser Malawi kechiba shim ta süra item linük nung malaria den raratsü asoshi inyakyim balala tenzüka lir. Item linük nungbo 'bed nets' amshidar, ajisüaka malaria agi shiranger jentidang lir.

Parnoki iba tashidak nokdangba maparen kanga renloka inyakdar, ajisüaka küm shia malaria agi iba tashidak shiranger tasen nisung million 212 adoker aser kasa tashidak agi nisung 429,000 asür, ta WHO-i ngutetba osang nung shia lir.

Malaria agi kanga mejungi atongba tesemji Africa ya lir aser tasür timba ka tanurtem lir.

SANGDONGER

Tanüla shin o ajanga, Longjang sor aser Longjang tsür shirnok sa Tanüla temeshi sempet akar pei sempet asüngsashitsü aser senso chir shir sa tanüla temeshi sempet anginer, **Kotak Prayer Centre, Longjang** nung 5-7th May 2017 nung akatsü.

Sentong nung speaker Wb. Lanurenba Longkhum alitsü. Tarur ajaki pei süoshi yipten sü abentsü. Iba sentong ya Jamir kidong Longjang-i ajak achayanga katsür. Ajaki sarasadema arungma.

- K.P.C, Longjang

Nagaland nunga...

(TAPAK 1 NUNGI...)

1800 mapang nungi Panchayat tem liasü aser British nunger yimsüsüba mapang local self Government ya parnoki aginüa liasü saka ibaji ozüing ka ama meyangu. Sorkari Village Council Act ama ozüing ka aginüa liasü aser ibaji ajanga centralization indang mapa tenzük, kechiyong linük ajungalen Panchayat shia nung pei pei inyakyim liasü aser town/ward shia nung inyakyim balala liasü, ta paisa shisem.

"Rural Development Department nung inyaker ajaki iba anogo atema nüma atangtsüla kechiyong 1992 nung India sorkari State Rural Development dang nungi asüngdangyaa Panchayati Raj Act ya mapa küma tenzük" ta RD Director-isa metetdaksü.

Nagaland nungbo Panchayati Raj Act benoka mali kechiyong Act nung elections agia züingsemtem shimtsü lateta lir. Election indang inyakyimji State Election Commission ajanga Legislative Assembly nung MLA ka shimba den kasa lir aser Panchayat chairman nem tashi balaka agütsür, ta paisa ashi.

"Nagaland nung VDB 1238 lir aser asenok 73rd Amendment kübok madener. Ibaji ajanga asenokbo terenlok maparen inyaksü atema tenokdangba kecha mali. Asen VDB tem ya tashitait rejutem lir aser asen state nung terenlok bener arutsü atema hadir tajung ka lir" ta Metsubo Jamir-isa shisem.

Iba sentong nung mendenji Joint Director, RD, K. Neibou Sekhose liasü, Joint Director, RD Neizovonuo-i temoatsü meshia sarasadem aser Additional Director tem- RD, Imlimeren Jamir o Nolegol Angami nati o jembi.

National jenjang nung Panchayati Raj Day ya Uttar Pradesh kübok Lucknow nung agi aser iba sentong nung Nagaland nung RD ketdangsertem aser VDB Secretary tem aden.

PELABA LEMSATEPER

ASO: 5 AUG 1923 - ASÜ: 11 APRIL 2017

Teti dang akhümtsüba aser meima aliba tsürabur asür **Imnanokdang** (Chuchuyimlang), shirangba anogo nungi tasüba anogo tashi shirnokisa rongsen, nübu aser tamang sarasadem ajanga onok den yaritepogo, nenok ajak dang kangasa pelaba lemsateper. Asen Teyanglur Tsüngremi nenok moajangma.



Temeim Chirnur, Semchir & Kinüngertem.

JAPU SENSO MUNG DANG

P.O. MANGKOLEMBA - 798604
MOKOKCHUNG : NAGALAND

METETDAKTSÜR

Japu Senso Mung dang ajanga 2nd May 2017, anogo Japu yimtak Moatsü benjongmung amungtsü ayongzüka lir. Iba benjongmung yim süngküm sübanga amungtsü ali nung senso ajak 1st May 2017 anogo tashi nungbo yim tongseptsü Mongdang Mendendi ajanga metetdaksür.

Sd/-
Noklen Longshir
President

Sd/-
Dr. Maong Chungmir
Secretary

PELABA LEMSATEPER

9th April 2017 anogo Japu yimtak yipru mopung agi ki-o-jen raksar tokrong aser timtem nung alidang, Khar Putu menden yim tonga arua nübu aser rongsen agi teyari tulu agütsüba asoshi Japu Putu Menden ajanga kanga pelaba lemsateper.

Sd/-
Tekawati, Chairman
Japu Putu Menden

Sd/-
Nungsang, Secretary
Japu Putu Menden

AKHOJAK CHANGDANG (B) TIMTEM NUNG LIR

20 April nü anüngdang teruto nisung shinga mesenzüba mapang nung Changdang o Aosüngküm yim ana tsüngda Tsürang Ayong merang yinzü agi yangluba apu ana kecha kuli makai rangtangtsü. Aser lenmang atsü agi atsüdang nung onok Akhojak Changdang (B) nung alir kibongtem aser nüburtem kanga dang timtem nung lir. Anungji yimteni iba ama nisung tamajung ashi-külak mapa inyaker nem tapet temerenshi agütsüsüla. Ibala mapa tamajung inyaker ya nüburtem aser lokti ajaki aitsüsüla.

I.Sashi Lkr
Akhojak Changdang (B)

Tuli Langpangkong Senso Telongjem Moatsü Mong Sentong

Anogo : 1st May 2017
Mapang : 10:00 AM

Tesentepdak : Forest & Raw Materials Contractors Association Conference Hall Tuli.

Nükjidong : Telongjem ajanga Tejakleni

KETDANGPURTEM

1. Tir : S. Sendong Ao
2. Tatong Tir : Bendangtoshi
3. Tongti Zülur : C. Tangit Jamir
4. Repsem Zülur : A. Tangit Jamir
5. Kimen : L. Yanger Lkr.
6. Senotsü Zülur : Sentiyanger.

SENTONGTEM

- 1) Menden : Ketdangpurtem
- 2) Sarasademtsü : Rev. C. Tongpang Pastor, TLBA
- 3) Tayongzüka O : President TLST
- 4) Sobaliba ken ka : Kangtsüng Senso Telongjem Tuli Executive Committee
- 5) Tepela O : T. Nukshi Ozüküm (10 mins)
- 6) Tajungshi O : Shri Imnalemba Imsong, DGM (HR&ES) NPPCL (20 mins)
- 7) TLST tenzükba otsü : T. Nukshi Yaden.
- 8) Melepzüng O : L. Yanger Lkr., Kimen.
- 9) Tezuluba osang :
- 10) Tatem Sarasadem : Mr. Rongsen Pastor TTBA

AO SENDEN
Commemorates Moatsü 2017
With the Participation of
ANGAMI PUBLIC ORGANIZATION



Date : 2nd May, 2017 Time : 10:00 Am Onwards
Venue : Denkongmen Sports Complex, Mokokchung

CHIEF GUEST:

Dr. Shurhozelie Leizetisi
Hon'ble Chief Minister, Nagaland

GUEST OF HONOUR:

Dr. Vishnu Selryn, President
Angami Public Organization (APO)

Host:

L. Pongkhasin Longjam

ORDER OF PROGRAMME

1. Invocation : Rev. Dr. Mar. Longjam
Executive Secretary, JRAM
2. Singing : Pankhok Shisem
3. Welcome Speech : L. Angang Jamir
President, Ao Senden
4. Musical Rendition (Pankhok) :
1) Mr. Ishang L. Indan
Hon'ble Minister/Coord. Sec. of State Change
2) Mr. Tapan Singh
Joint. Chief Secretary to P.A. Government of Nagaland
3) Mr. Hideo Yagita, President APO
4) Mr. Mahang Sangit President, APO
5) Mr. Mawli, President World Mungling
5. Cultural Display :
6. Speech from the Guest of Honour : Dr. Vishnu Selryn President, APO
7. Address : Longjam Longjam Mungling
8. Speech from the Chief Guest : Dr. Shurhozelie Leizetisi,
Hon'ble Chief Minister of Nagaland
9. Anthem : Ao Anthem
10. Cultural Rendition :
1) Longjam Mungling
2) Western Angami Public Organization (WAPG)
3) Aungmy Mungling
4) Eastern Angami Public Organization (EAPG)
5) Jangpang Mungling
6) Western Angami Public Organization (WAPG)
11. Prayer : Dr. J. J. Rind Uden Mithabang,
L. J. J. Mawli Mungling
L. J. J. Mawli Mungling
12. Vote of Thanks : Mr. M. S. Longjam
Former President, Ao Senden
13. Benediction : Rev. J. J. Rind Uden Mithabang,
Dean, Baptist Church, Mokokchung

Moatsü Feast

Volunteers: APO (local) & Ao Students' Conference (ASC) Official

OFFICE OF THE AO SENDEN

H.Q: MOKOKCHUNG : NAGALAND
Ph: 0369-2228896/ e-mail: aosenden@gmail.com

Date: 24-04-17

JAOKER

Ao kin meraket sobaliba benjung wazüka ayutsü nükla tulu yur Ao Senden-i koba May 2, 2017 anogo Moatsü walu Ao kin yimtiba Mokokchung jila nung ayongzüka lir, iba benjungmong nung Ao senso anüdok anülü alir ajak longsopepa arua adentsü Ao Senden Mendenti nungi yimyim ayimoktsür.

Kin ka sobaliba yangerba nung ibai shilem tulu ta angateta Ao senso ajaki pei sübotsü ayak tabensa agir tangateta tajung nung arua iba benjungmong nung shilem agitsü sangdonger.

Sd/-
(C Angang Jamir)
Acting President

Sd/-
(L Tally Lkr)
Acting Secretary

1buba Nagaland Open Angling Competition 2017 kaogo

Dimapur, April 24 (TYO) : 1buba Nagaland Open Angling Competition 2017 April 22, 2017 nü Nounes Resort, Dimapur nung kaogo. Iba tetoktepba nung state tesem balala nungi nisung 147-i shilem agi aser parnok rongnung Assam nungi nisung 19 tashi liasü. Iba tetoktepba ya Department of Fisheries Govt. of Nagaland-i sen teyari agüja Anglers Association Nagaland (AAN)-i ayong, ta Anglers Association Nagaland (AAN) Dimapur, Nagaland nung Tongti Tezulur, Ricky Ozukum-i sangdong ka ajanga metetdaksü.

Angling Competition 2017 ya shia aliba anepdang 7:00 ako nungi tenzük aser nikongdang 3:30 ako nung tembang. Iba tetoktepba nung tetendangertemji DFO-Dimapur, Dr. Vimeso Kire, Dept. of fisheries, Govt. of Nagaland nung Deputy Director, Wb. Neitho Kuotsu aser AAN Tir, Wb. Phukato Sumi nung liasü.

Tetoktepba nung Dimapur District Angling Association nungi Impang Imchen-i ango seret 3.395 pua mezüing jenjang nung takok angu aser tanabuba jenjangji ango seret 3.095 apusang, All Assam Game Fishing Association nungi Pranjal Das-i angu. Tasembuba jenjangji Lipoktemsü-i ango seret 1.865 apuba atema angu. Mezüingbuba,

tanabuba aser tasembuba jenjang nung takok angurtem nem sen 50000/-, 30000/- aser 20000 senpet den takok marok aser kuli kakette agütsü, ta sangdong ajanga ashi.

Iba tetoktepba nung nisung anati jenjang 10buba ngutet kechiba süra tena nisung shiai apuba angoji seret kasa, 0.805kg liasü.

Iba tetoktepba tatem sentong nikongdang 4:00 ako nung agi aser sentong ya, tenüngteta jaoker, Lok Sabha MP Neiphu Rio-i akhümketdaksü.

Neiphu Rio-i, asen lima nung ango apudang mim mozü aser tapoktsü amshia apuba ajanga tarutsü atema takoksa bener arur. Ajsüüaka angling ya Naga nung asoshi saisapong tasen ka lir aser Tizu ayong amala nungbo iba asaya kanga takok ngua benschitetsü koba ajanga lipoküm meraksatsür, ta ashi.

Takok angurtem nem

senpet ajak pai agütsü.

Kasa sentong nung Additional Director of Fisheries, Wb.C Imtitongzuk Longkumer-i, department yimya ka ama ango metsüba dang masü saka state nung 'recreational fishery tourism' atema ango metsütsü aser iba den külemi Department of Fisheries, Govt. of Nagaland-i Nagaland Open Angling Competition ya küm shia akaba sentong ka kümdaktsütsü, ta metetdaksü.

Tan iba tetoktepba nung tetsür ka kijai shilem agi aser laji Dimapur nungi Atsibu Konyak liasü. Sentong ayongertemi la nem rod aser reel agüja liasü, ta sangdong nungji shia lir.

Tetoktepba nung takok angurtem tenüing DFO, Dimapur, Dr. Vimeso Kire-i metetdaksü, aser parnok tenüngtem yamai lemsateper:

TAKOK ANGURTEM:

1st	: Impang Imchen	- 3.395kg.
2nd	: Pranjal Das	- 3.095kg
3rd	: Lipok Temsu	- 1.865kg
4th	: Zuben Patton	- 1.850kg
5th	: Sensimong Ngullie	- 1.040kg
6th	: Subashi Das	- 1.025kg
7th	: Wati Walling	- 0.985kg
8th	: Khekiho Assumi	- 0.975kg
9th	: Hito	- 0.820kg
10th:	a) Bappon Obenath	- 0.805kg
	b) Lipok Kari Longchar	- 0.805kg

Northeast-a football tsütsü joko tain kümogo:Mizoram CM



Aizwal, April 24 (Agencies) : Hombarnü Mizoram Chief Minister Lal Thanhawla-i, northeast-a football tsütsü tanur masü saka lenir kümogo. Mizoram ang masü saka Manipur aser Assam state tem nungia national level nung asayatetsüsa kümogo, ta tesüüba mapang India football team captain Baichung Bhutia-i ashiba o den sema ashi.

Pai, "Ozü state nungi item asyartem asoshi ni nema tanga bilemetsür," ta I-League asayamung nung tang mezüingsüa asayaba telok, Aizawl FC-i kanga junga asayateta northeast tesem nung aliba club tem rongnungi tan mezüingsüa temaba jenjang angutsü anasa aliba ngua kanga pela ashi.

Honibarnü Kolkata nungi team tajungtiba, Mohun Bagan

madak 1-0 agi takok anguba telok, Aizawl FC-i taruba asaya nung draw ang asüyonga I-League title abentsü.

Aizawl FC ya I-League table nung team 10 rongnungi temaba jenjang nung lir. Parnoki asaya 17 asayaba nungi points 36 nguteta lir.

Honibarnü tamakok anguba sülen Mohun Bagan tanabuba jenjangi luogo. Parnoki asaya 17 asayaba nungi points 33 nguteta lir.

Deobarnü I-league tatemsa buba asaya nung Aizawl FC-i Shillong Lajong FC den draw ang asüyonga parnoki takok marokji angutsü.

Parnoki makok ka asüyonga Chennai City FC puri Deobarnüsa ano asaya tanga ka nung Mohun Bagan madak takok ngura marokji Aizawl FC meyongsa asütsü.

Lal Thanhawla-i, "Ni kanga pelar. Ozü lanurtemi Santosh trophy-i bena lir. Iba takok ya parnok asoshi mezüingbuba masü. State kibong ajak nung kanga pelateptsü. Mizo nungertem aika football asayaba ajanga pei tebok mesüteter, kechiba süra parnok aika linük nung aliba club tulutem nungi asayar," ta Hombarnü osangbenertem dang ashi.

"Ni Aizawl FC kibur Robert Romawia Royte nem tenüngsang agütsür. Pai Mizoram Football Association (MFA) kübok mapang, rongsen aser tashi jenti intoka iba telok asoshi kanga bendanga agüja inyaker. Iba takok ya Mizoram nung ajak asoshi lir," ta pai shisem.

Asaya moapu tsütsü jembiba mapang punguben tashi Mizoram nung Chief Minister inyaksang, Thanhawla-i, tanga northeast state tembo Mizoram dang nungi senotsü jenjang tajungba lir, anungji ni parnok den rongsen agibo meyariteptsü, saka shisatsü agibo yariteptsü. Mizoram bo Northeast nung aliba lenten state tem nung ama masü aser football asayaba moapu ka yanglutsü asoshi sen crore aika nungdaksü, ta ashi.

APRIL 24, 2017 ASAYA
Bangalore **VS** Hyderabad - 8:00 PM

APRIL 24, 2017 ASAYA OSANG
Pune Supergiant 160/6 (20/20 ov)
Mumbai Indians 51/1 (7.1/20 ov).....



Mumbai, April 24 : Tanü Mumbai Indians o Rising Pune Supergiant, na IPL 2017 asayadang Ajinkya Rahane-i six ka azükba yangi noksa nung angur.

Frolic Cup 2017:Anogo 6 nü buba asaya osang

Dimapur, April 24 (TYO) : Local Ground, Medziphema nung tang tasayadak, Frolic Cup 2017, anogo trok nü buba asaya nung team ti-i tan hopta asayatsü aliba quarter final atongtsü asoshi toktepa asaya liasü, ta Frolic Club Tir, Kepe Nakhro aser Games & Sports Secy, Nizhalhu Kuotsu nati sangdong ka ajanga metetdaksü.

Mapang shia tzülu nana-a aser tzüingsang mejungi kümaka tanü Hombarnü asoshi mezüing asaya anepdang 7:00 ako nungi tenzük Khanakhurü Students' Union aser Young Maniac, Khanakhurü telok na tsüingda asaya. Iba asaya nung Khanakhurü Students' Union-i 1-0 agi akok.

Tanabuba asaya nung Molvom & Youth Students' Union aser Khaibung FC na asaya, ajsüüaka telok katia goal ka danga meyoktetba ajanga penalty metsütepa nung Molvom Youth & Students' Union-i 5-3 agi Khaibung FC

madak takok angu.

Nikongdang mezüingbuba asaya 2:00 ako nungi tenzük Khanglai FC, Khaibung aser Black Hornets, Chumukedima na tsüingda asaya. Iba asaya nung Khanglai FC-i 5-2 agi Black Hornets telok madak takok angu.

Nikongdang 3:30 ako nungi tenzük tanü asoshi asaya pezübuba aser tatembangbuba asaya nung KYC 'B' aser Legend Jr, Chumukedima Town na asaya aser iba asaya nung KYC 'B'-i 3-0 agi takok ngua quarter final-i tuogo.

April 25, 2017 nü Tsiepama Youth Organisation aser BKK TBCM na tsüingda anepdang 7:00 ako nungi aser KYC 'A' aser KYC 'B' na tsüingda anepdang 8:00 ako nung asayatsü. Nikongdang MVYO aser Zoungam FC na 2:00 ako nungi aser tatemsa Winfield FC aser Young Generation, Old Piphema na 3:30 ako nungi tasa asayatsü sentong lir, ta sangdong ajanga ashi.

EVERYONE FEELS THE PAIN!

Oajm
FAST RELIEF FROM PAIN

A Product of LIVSAV Group
CUSTOMER CARE:- 0250-6580183

BILEMDANGANG
"Tangar nem lemsatepba yari asen nem meyipa moatsür".